

1 Corintios

Pablo Cohãcjũ yequinare Corinto cãenare ojoa ohoahye

1 ¹⁻²Yũhũ Pablo, Jesucristo yere buhe duti tiquiro cũrigũ ijiaja. Cohãcjũ tiquiro cahmeno sahata Jesu tiquiro cũacjũre beseahye yũhũre tiquiro. Mũsare Cohãcjũ yequinare Corinto cããnare ojoa ohoaja yũhũ. Sostene mehna quehnoa dutiaja mũsare. Ahriquiro gũhũ mari acayũro Jesu yaquiro ijire. Jesucristo mehna cããna mũsa ijigũ Cohãcjũ yequina ijiana beseahye Jesu mũsare. Sa ye ijipihtiyequina apequina mari pũhtoro Jesucristore siniñequina ijie, tiquina gũhũ Cohãcjũ yequinata ijire. Tiquina sa ijigũ Jesucristo pehe mari ijiphtina pũhtoro ijire. Sa yena mũsare ijiphtinare ojoa ohoaja yũhũ. ³Sa yena Cohãcjũ mari Pacũ, mari pũhtoro Jesucristo mehna mũsare quehnoa dutiaja. Tiquina yedohoye mehna quehnoano ijiaja mũsa.

**Jesucristo pehe mũsare quehnoano ye basahye
mari Pacũ tiquirore dutiriro sahata**

⁴Jesucristo yequina mũsa ijiri bato tiquiro pehe mũsare quehnoano ye basare Cohãcjũre. Tiquiro sa yegũ ihñagu, Cohãcjũre “Quehnoare”, niducuaja yũhũ decoripe. ⁵Cristo yequina mũsa ijigũ ihñano Cohãcjũ pehe mũsare quehnoano ijigũ yere. Sa yero tiquiro yere mũsare apequinare quehnoano yahuanare yeri tiquiro. Sa yero tiquiro yere quehnoano masigũ yeri mũsare. ⁶Cristo yere mũsare usã buheriro sahata sata wahari mũsare, Cristo yequina mũsa wahagũ. ⁷Sa yero Cohãcjũ mũsare quehnoano yedoho peho cãnota. Mari pũhtoro Jesucristo ahri yehpapũ tiquiro tojoa tatire mũsa cohtero watoa Cohãcjũ pehe mũsare sa yedohoducurota. ⁸Sa yero Jesucristo pehe mũsa ñãñe yerire cohãriquiro ijire. Tiquiro sa ijiriquiro ijigũ mũsa pehe decoripe, ahri deco pihtigũpũ gũhũre mũsa ñãñe yerire tiquiro cohãnohrina ijiducunata. Sata tiquiro mũsare yedohorota. Sa yena Jesucristo mari pũhtoro tiquiro tojoa tagũpũre ñãñe buhiri mariena ijinata mũsa. ⁹Tire Cohãcjũ tiquiro nidiro sahata tiquiro yere. Tiquiro macũno mari pũhtoro Jesucristo yequina ijianare marine beseahye. Tiquiro sa besenohrinare Jesu yequina ijigũ yeri marine.

Jesu yequina Corinto cjēna cahmecoañe cahme tuhtiahye

¹⁰Yũhũ acaye, mari pũhtoro Jesucristo tiquiro dutiro mehna mũsare tutuaro dutigũ tagũ niaja ahrire: Mũsa basi cahme tuhtieracãhña. Sa yena mũsa basi cahme tu waeracãhña. Ihcã curuata ijiaja mũsa. Sa yena sijoro saha ni yahuducueracãhña mũsa basi. Sa yena mũsa yeatire tuhotuna, ihcãno mehna yeya mũsa.

¹¹Yũhũ acaye, mũsa basi cahme tuhtina niñohti mũsa. Sa ni yahuri Cloe ya wũhũ cjēna yũhũre. ¹²Ihquẽquina mũsa mehna cjēna ohõ saha ni cahme tuhtiñohti: “Pablo ya curua cjãna ijiaja usã”, ni cahme tuhtiñohti ihquẽquina mũsa. Sa ye apequina “Apolo ya curua cjãna ijiaja usã”, niñohti tiquina gũhũ. Sa ye apequina pehe “Pedro ya curua cjãna ijiaja usã”, niñohti tiquina gũhũ. Sa ye apequina pehe “Cristo ya curua cjãna ijiaja usã”, niñohti tiquina gũhũ. ¹³Mũsa sa niepegũta Cristo yequina ihcã curuata ijiaja mari. Mari basi cahme tu wa doco masiedaja mari. Ihcã curuata ijiaja mari. Yũhũ Cristo ijieraja. Tiquiro yero saha mũsa ye buhirire curusapũ yariarigũ ijierũ. Tutuayere cũoeraja. Sa yegũ ihyo ijigũ ijiaja. Sa yero mũsare apequiro wame yero, Cristo ye tutuaye mehna wame yeri. Yee tutuaye mehna wame yerari. ¹⁴Mũsare, mũsa mehna cjēna gũhũre wame yerũ yũhũ. Crispore, Gayo gũhũre tiquina dihitare wame yei. Apequina pehere wame yerarigũ yũhũ ijigũ quehnoare yũhũre. ¹⁵Peyequina masare wame yerigũ yũhũ ijigũ “Pablo ye tutuaye mehna tiquiro wame yeri usãre”, ni ihñaboaga mũsa yũhũre. Sa yegũ tire cahmedũ. ¹⁶Estefana ya wũhũ cjēna gũhũre wame yei yũhũ. Topequinata wame yei yũhũ. Apequinare yũhũ wame yeriquinare boaa wahaũ yũhũ. ¹⁷Cristo yũhũre ohoro, wame yeacjũre cũedari tiquiro yũhũre. Quehnoañe buheyere buheacjũ pehere cũri yũhũre. Cristo curusapũ tiquiro yariarire yahuye buheye marine quehnoana wahagũ yere. Tiquiro sa yepegũta quehnoañe buheyere yũhũ esa tuharo yũhũ buhegũ yũhũ pehere ihña wahãboaga mũsa. Mũsa sa ihña wahãna quehnoañe buheye pehere ño peoeraboaga mũsa. Sa yena quehnoana wahaeraboaga. Sa yegũ Jesu ye buheyere buhegũ yũhũ esa tuharo yũhũ masiñe mehna buheraja yũhũ.

Cohãcjũ tiquiro tutuayere tiquiro masiñe gũhũre cũoriquiro ijire Cristo

¹⁸Pecapũ butiatiquina pehe Cristo curusapũ tiquiro yariarire yahuye buheyere “Tũho masieñequina ye buheye ijire ti”, nimene butiatiquina pehe. Mari pehe Cristo tiquiro yũhũonohatina ijina ohõ saha niaja: “Curusapũ tiquiro yariarire yahuye buheye ti waro ijiro nine. Ti buheye Cohãcjũ tiquiro tutuayere yahure marine”, niaja mari. ¹⁹Cohãcjũ pehe tiquiro yere tiquina ojoari pũpũ ohõ saha nine:

Ahri yehpa cjēnare “Quehnoano masiñequina ijire”, tiquina niñequinare tiquina masidire dũhseati ijieragũ masigũ yeitja yũhũ, niahye Cohãcjũ tiquiro yere tiquina ojoari pũpũ.

²⁰Sa ye ahri yehpa cjēna quehnoano masiñequina dūhseatiquina ijierare. Ūsā acaye judio masare buheyequina gūhū dūhseatiquina ijierare. Yojoṗære yahuducu mihniñequina gūhū dūhseatiquina ijierare. Ahri yehpa cjēna quehnoano masiñequina tiquina ijiepegūta masieñequina tiquina ijyere masigū yeri Cohācjū. ²¹Cohācjū pūrīta quehnoano masiniquiro ijire. Tiquiro sa ijigū ahri yehpa cjēna tiquina esa tuharo tiquina masiñe mehna Cohācjūre ne masiedare tiquina. Cohācjū tiquiro masi dutiero sahata sa wahari tiquinare. Cohācjūre cahmeeñequina pehe ohō saha nine quehnoañe buheye warore: “Tūho masieñequina ye buheye ijire”, nimene. Sa yeye quehnoañe buheyere “Tūho masieñe buheye”, tiquina niñe buheyere tūhoye, Cristore masi dūcare masa. Tiquina sa masi dūcagū Cristore tiquina wacū tutuagū ihñano tiquinare tiquiro yequina wahagū yere Cohācjū. Sa waha dutiri tiquiro.

²²Judio masa Cohācjū tutuaye mehna tiquiro ye ihñorire ihña duaye nine. Sa yeye griego masa pehe, judio masa ijieyequina pehe quehnoano tiquina masiatire macañe nine. ²³Mari pehe Cristo curusapū tiquiro yariarire yahuye buheyere buheaja mari. Ti buheyere judio masa pehe ihña tuhtire. Sa ye ti buheyere judio masa ijieyequina pehe “Tūho masieñequina ye buheye ijire”, ni tūhoture. ²⁴Tiquina sa ni tūhotuepegūta Cohācjū yequina ijiatire tiquiro beseriquina pehe ti buheyere ohō saha nine. “Cristo ye buheye Cohācjū tutuayere tiquiro quehnoano masiñene masigū yere marine”, nine tiquina ahri buheyere. Tiquina judio masa, judio masa ijieyequina ijiepetā, sa nine Jesu yequina.

²⁵Cohācjū masi pehoriquiro ijire. “Tiquiro tūho masieniquiro ijire”, masa tiquina ni tūhotuepegūta ahri yehpa cjēna yūhdūoro quehnoano masi pehoriquiro ijire tiquiro. Sa yero Cohācjūre “Tutueriquiro ijire”, masa tiquina ni tūhotuepegūta tiquina bui tutua yūhdūdūcariquiro ijire tiquiro. ²⁶Ti yūhū nidi ijirota ijire.

Yūhū acaye, Cohācjū mūsare tiquiro yequina wahagū tiquiro yegū mūsa peyequina ihyo ijina mūsa ijirire wacūña mūsa. Ahri yehpa cjēnare “Quehnoano masiñequina”, tiquina niñequinare meheñequinagā Jesu yequina ijiatiquinare beseahye Cohācjū. Sa yero pūhtoa gūhūre meheñequinagā Jesu yequina ijiatiquinare beseahye tiquiro. Sa yero pūhtoa pohne gūhūre meheñequinagā Jesu yequina ijiatiquinare beseahye tiquiro. ²⁷“Tūho masieñequina ijire”, tiquina niñequinare Cohācjū beseahye “Quehnoano masiñequina ijire”, tiquina niñequina tiquina būoro wahatire. Sa yero “Wacū tutueyequina ijire”, tiquina niñequinare Cohācjū beseahye, “Wacū tutuayequina ijire”, tiquina niñequina tiquina būoro wahatire. ²⁸Masa tiquina ihña tuhtieyequinare “Dūhseatiquina ijierare”, nine masa. Tiquina sa nidiyequinare Cohācjū tiquiro yequina ijiatiquinare beseahye tiquinare. Sa besero “Pūhtoa waro ijire”, tiquina niñequinare ihyo ijieyequina tiquina ijiyere masigū yeahye Cohācjū tiquinare. ²⁹Tiquiro sa yegū ahri yehpa cjēna ne ihcāquiro “Tutuagū, quehnoano masigū ijiaja”, ne ni yūhdūdūca masiedare, Cohācjū ihñonopū.

³⁰Cohācjū pehe marine Jesu yequina ijigū yeri. Tiquiro yequina ijina marine tiquiro yūhdūori bato ijipihtiye decori Cohācjū mehna ijinata mari. Jesucristo

pehe Cohãcjũ yere quehnoano masigũ yere marine. Sa yero mari ñaãe buhirire cohãre. Sa yero mari ñaãe yerire cosero, marine “Quehnoañequina ijire”, Cohãcjũ ni ihñagũ yere Cristo Cohãcjũre. Sa yero marine pecapũ wahaborinare yũhdũore. ³¹Tiquiro sa yegũ Cohãcjũ yere tiquina ojoari pũpũ tiquiro ni ojoariro sahata sa wahare: “Yũhũ esa tuharo masi pehogũ ijijaja”, nidiquiro tire niedacãhdo. Ohõ saha niahdo: ‘Mari pũhtoro Cristo pehe marine yũhdũoriquiro ijire’, niahdo tiquiro”, nine Cohãcjũ yere tiquina ojoari pũpũ.

Ahri buheye Cristo curusapũ tiquiro yariarire yahure

2 ¹Yũhũ acaye, mũa cahapũ esagu “Quehnoano masi pehoaja”, mũsare ni buherũ. Cohãcjũ yere mũsare buhegu, sa ni buhegu niedũ. ²“Ohõ saha ni buheita”, nigũ mũa mehna ijigu Jesucristo ye dihitare curusapũ tiquiro yariari dihitare wacũgu, ti buheyere buhei yũhũ. ³Sa yegu mũa mehna ijigu ihyo ijigu yero saha ijii yũhũ. Sa yegu Cohãcjũ yere queoro buhe duagu ijigu cuegu, nanaredigu yero saha ijii yũhũ. ⁴Sa yegu Cohãcjũ yere buhegu, “Masi pehoaja”, ni buherũ. Tiquiro yere yũhũ buhegu Espĩritu Santo tutuaye mehna yũhũ buhegu ihñari mũa. ⁵Ohõ sahata ni buhei yũhũ mũsare masa tiquina esa tuharo buheye pehere mũa cahmedatire. Cohãcjũ pehere mũa wacũ tuatire sa ni buhei yũhũ.

Espĩritu Santo pehe Cohãcjũ ijiye tiyere buhere marine

⁶Sa yena Cohãcjũ ye buheyere tiquiro masiñene mũsare Jesure quehnoano wacũ tutuanapũre yahuaja usã. Masa tiquina esa tuharo tiquina buheye yero saha ijierare ahri mũsare usã buheye. Ti buheye pũhtoa ye buheye gũhũ ijierare. Tiquina pũhtoa pehe piltia wahaeta. ⁷Apequina tiquina masiedarire Cohãcjũ ye yahuducuyere yahuaja usã pehe. Panopũ ahri buheyere Cohãcjũ yequina mũa quehnoano masi pehoerahye. Ahri yehpa ijianto pano ahri buheye ti nidiro sahata “Sata wahaahro”, ni tuhasahye Cohãcjũ. Marine pecapũ wahaborinare tiquiro yũhdũoatire, tiquiro mehna mari ijianti gũhũre “Sata wahaahro”, ni tuhasae tiahye tiquiro. ⁸Tiquiro sa nigũ Cohãcjũre cahmeeñequina pũhtoa ne tiquiro ye buheyere tuho dueraye, masiedare. Tire quehnoano masiñe, mari pũhtorore Cohãcjũ macũno warore curusapũ quẽ biha wejẽdaboaya tiquina. ⁹Cohãcjũ yere tiquina ojoari pũpũ ohõ saha nine:

Ijipihtiyequina Cohãcjũre cahĩñequina ye ijiatire Cohãcjũ quehnoano quehno basa tuhasahye. Quehnoa yũhdũyere tiquiro quehno basahye. Tire masa ne ihñedari. Sa ye tire ne tuhoerari. Tire dũhse masino basioerare marine, nine Cohãcjũ yere tiquina ojoari pũpũ.

¹⁰Tiquiro sa niepegũta Espĩritu Santo pehe Cohãcjũ yere masigũ yere marine. Ijipihtiyehye Cohãcjũ yere Espĩritu Santo masi pehore. Sa masino tiquiro marine tire masigũ yere.

¹¹Ne apequina pehe masũno tiquiro masiñene ne masiedare. Sa ijiepegũta masũno pehe tiquiro esa tuharo tiquiro wacũñepũ tiquiro tuhotuyere masine. Sata apequina Cohãcjũ tiquiro masiñene ne masiedare. Cohãcjũ yaquiro Espĩritu Santo

dihita tiqiro masiñene masine, masuno tiqiro esa tuharo tiqiro wacũñene tiqiro masino sahata. ¹²Sa yena mari pehe Jesu yequina ijina masa tiquina esa tuharo tiquina buheyere cuoeraja. Cohãcjũ yaqiro Espiritu Santore ohori marine masigũ yero taro. Marine tiqiro quehnoano yeatire masigũ yere Espiritu Santo pehe. ¹³Sa yena Cohãcjũ yere musare buhena, masa ye masiñe mehna usã esa tuharo buheraja usã. Espiritu Santo tiqiro buheye pehere musare buheaja. Sa buhena Espiritu Santore cuoyequinare Cohãcjũ yere quehnoano buheaja usã.

¹⁴Espiritu Santore cuoyequina pehe Espiritu Santo yere ne cahmedare. “Tiqiro ye ihyo warota ijire”, nimene tiquina. Espiritu Santo tiqiro yedohoro marieno tiqiro yere masino basioerare masare. Sa ye tiquina tiqiro yere ne masiedare. Espiritu Santo yedohoro mehna tiqiro yere masiaja mari. ¹⁵Espiritu Santore cuoyequina pehe Cohãcjũ yere quehnoano masine. Apequina pehe tiquinare “Quehnoañequina ijire. Ñañequina ijire”, ni bese masiedare Espiritu Santore cuoyequinare. ¹⁶Ohõ saha nine Cohãcjũ yere tiquina ojoari pũpũ: “Mari pũthoro Cristo tiqiro tũhotuyere masiñequina ne mariedare. Sa ye tiqirore masa duti masiedare”, nine tiqiro yere tiquina ojoari pũpũ. Mari pehe Cristo yequina ijina, Cristo yero sahata masiaja.

Jesu yequina ihcãno saha Cohãcjũre dahra cohteyequina ijire

3 ¹⁻²Yũhũ acaye, musare buhegũ Espiritu Santore quehnoano yũtiyequinare yũhũ buheriro sahata buhe masiedũ masa pehere. Cristo yequina ijiepenata, macanagã dihire tiquina ihya masieno saha Cohãcjũ yere quehnoano masiedare mũa. Yojopũ gãhũre quehnoano masiedañõhti mũa. Ahri yehpa cjẽna ñañequina yero saha tũhotuñõhti mũa. Sa yena macanagã epẽcore tiquina apũno saha mijoeda cjũñe buheye dihitare tũhoñõhti mũa. Sa yegũ ti yero saha ijieye buheye dihitare buhei musare. Cristo yequina ijiepenata macanagã tiquina ihya masieno sahata Cristo yere quehnoano masiedañõhti mũa. ³Mũa pehe mũa mehna cjẽnare cahme coona, cahmequena, mũa basi ihquẽ cururi tu wadũca sana, Espiritu Santore cuoyequina yero saha yena niñõhti mũa. Sa yena ahri yehpa cjẽna Cristore cahmeeñequina yero saha yeñõhti mũa. ⁴Ohõ saha niñõhti mũa: “Pablo ya curua cjãna ijiaja usã”, niñõhti mũa ihquẽquina. Sa yena apequina mũa mehna cjẽna pehe “Apolo ya curua cjãna ijiaja usã”, niñõhti. Mũa sa ni yahuducuna Espiritu Santo marieñequina yero saha ni yahuducũñõhti mũa.

⁵¿Yũhũ Pablo, Apolo mehna dũhseanaja ijiajari usã, mũa tũhotugũ? Ohõ saha yeana ja ijina niaja usã: Cohãcjũ tiqiro dutiriro sahata tiqirore dahra cohtena ihyo ijina ijiaja usã. Sa yena musare usã buhegũ tũhona Jesucristore wacũ tutua dũcare mũa. ⁶Quehnoañe buheyere buheyequina wesepũ dahrayequina yero saha ijire, mari queoye mehna buhegũ. Wese upũro tiqiro ote mũhtariro saha yũhũ gãhũ musare buhe mũhtarũ. Sa yero apequiro wesere tiqiro cure mũnũ tãno saha Apolo pehe yũhũ bato musare buhe mũnũ tãri. Usã sa buhepegũta wese cjẽ oteyere bũcua nemogũ tiqiro yeriro saha Cohãcjũ pehe musare tiqiro yere masi nemogũ yeri. ⁷Sa yegũ yũhũ buhe mũhtarigu ijiepeguta ihyo ijigu

ijijaja. Sa yero Apolo yũhũ bato buhe nemoriquiro gũhũ ihyo ijiriquireta ijire. Cohãcjũ pũrita oteyere tiquireo bucua nemogũ yeriro saha tiquireo yequinare tiquireore masi nemogũ yere. Sa yena Cohãcjũ pehere ño peoro cahmene musare. ⁸Ote muhtariquireo, came cure nũnũ tãriquireo ihcãno saha dahra cohteyequina ihyo ijieyquinata ijimene tiquina. Sa ye tiquina dahrariro punota wapatare tiquina. Sata ijijaja usã, Apolo mehna. ⁹Sa yena usã Cohãcjũ yere dahra cohtena ijijaja. Sa yero Apolo yũhũ mehna cjũno ijire. Usã sa ijigũ musa pehe Cohãcjũ ya wese yero saha ijire. Musa sa ijigũ Cohãcjũ ya wese cjẽ oteyere tiquireo bucua nemogũ yero saha musare tiquireo yere masi nemogũ yerota tiquireo.

Sa ye Cohãcjũ musare tiquireo yequinare quehnoari curua yero nine. Sa yena utã mehna tiquina yeri wũhũ yero saha ijire musa tiquireo ya curua cjãna, mari queoye mehna buhegũ. ¹⁰Musa sa ijigũ Cohãcjũ yũhũre tiquireo dutiriro sahata yũhũ pehe wũhũ dahre mihnidiquiro utãre tiquireo cũ muhtariro sahata Jesucristo yere musare buhe muhtaũ. Sa yero ti utã paca bui apequireo tiquireo ye nemo mujano sahata apequireo yũhũ bato buhe nemo nũnũ tãno nine. Sa buhe nemono quehnoano mehna buherota. Sa yero Cristo ye dihitare buherota tiquireo. Sata buheahro tiquireo. ¹¹Wũhũre tiquina dahre dũca tiquina cũ muhtaria utã yero saha ijire Cristo. Sa yena ti utãre usã quehnoano cũ muhtariro saha Cristo yere buhe tuhasaũ. Apequireo ye buheye pehere mari buhegũ quehnoaedaga.

¹²⁻¹⁵Uru mehna, plata mehna, wapa bujũye utã paca mehna mari yeri wũhũre mari ujũa tuhugũ ujũedare. Sata Jesucristo yere mari quehnoano yeri bato pihtiri deco ijigũ Cohãcjũ mari yerire ujũa tuhuriro saha yerota mari yerire masino taro. Sa tiquireo yegũ quehnoano yeri wũhũ ujũedariro saha mari yerire ti quehnoañe ijigũ masinota. Sa yero mari quehnoano yerina mari ijigũ masigũ yerota tiquireo. Quehnoano mari yeri wapa quehnoano yerota marine.

Sa yero yucãri mehna, taa mehna, ñaidi pũri mehna mari yeri wũhũre mari ujũa tuhugũ ujũa wahare. Sata Jesucristo yere mari quehnoano yerari bato pihtiri deco ijigũ, Cohãcjũ mari yerire ujũa tuhuro yero saha yerota mari yerire masino taro. Sata tiquireo yegũ ñano yeri wũhũ ti wũhũ ujũariro saha mari yerire ñañe ijigũ masinota. Sa yero mari quehnoano yerari bato ijigũ marine masigũ yerota tiquireo. Sa yero quehnoano yerarina mari ijigũ ihñano quehnoañene mari yemedi wapare quehnoano yesi marine. Sa ijieyquinare Cohãcjũ yũhdũorota. Sa ye sa quehnoano yerariquina mehenogã mehna yũhdũeta.

¹⁶Musa pehe Jesu yequina Cohãcjũ ya wũhũ yero saha ijire. Musa sa ijigũ ihñano ti wũhũpũ tiquireo ijiboro saha Espiritu Santo pehe musa mehna ijire. ¿Tire masiedajari musa? ¹⁷Cohãcjũ ya wũhũ ñañe marieni wũhũ ijire. Sa yena musa gũhũ ti wũhũ yero saha ijina tiquireo yequina waro ijire. Sa yero Jesu yequinare ihcãquireo dojomehnegũ Cohãcjũ pecapũ cohãnota tiquireo pehere.

¹⁸Ni mehoñene tuhoturacãhña musa. “Yojopũ cjẽna ye masiñene quehnoano masiaja”, ni tuhoturiquiro musa mehna cjũno ijiro Jesu ye pehere quehnoano masiahdo. Tiquireo sa masigũ ihñañe apequina tiquireore “Tũho masieniquiro ijire”, nieta. Sa yero Jesu yere masino, potota quehnoano

masidiquiro waharota. ¹⁹Masa esa tuharo tiquina basi tiquina masiñene “Ithyo warota ijire”, ni tuhature Cohãcjũ. Sata nine Cohãcjũ yere tiquina ojoari pũpu: “Tiquina esa tuharo masiñequina tiquina masiñe ðuhseati ijierare, Cohãcjũ tiquiro ihñagũ. Sa yero tiquina cahmeno saha yeragũ yere tiquinare”, nine Cohãcjũ yere tiquina ojoari pũpu. ²⁰Sa ye ape pũpu ohõ saha nine: “Masa tiquina esa tuharo masi pehoyequina tiquina tuhutuye ðuhseati ijieragũ masine mari puhtoro Cohãcjũ pehe”, nine Cohãcjũ yere tiquina ojoari pũpu.

²¹⁻²²Sa yena “Pablo ya curua cjãna ijiaja usã”, niedacãhña. “Apolo ya curua cjãna ijiaja usã”, niedacãhña. “Pedro ya curua cjãna ijiaja usã”, niedacãhña. Usã ijipihitina mûsa yequina dihita ijiaja. Ijipihitiye mûsa ye ijire. Cohãcjũ tiquiro bajumehnedire, catiye gãhũre ohori mûsare. Sa yero pecapu wahaeragũ yerota mûsare. Yojoðu ijiyere, cameru ijiahi gãhũre mûsare ohorota. Sa ye ijipihitiye mûsa ye ijire. ²³Sa yena mûsa pehe Cristo yequina ijire. Sa yero Cristo pehe Cohãcjũ yaquiro ijire.

Cristo tiquiro yere buhe duti tiquiro cũriquina tiquina dahrayere yahuahye Pablo

4 ¹Ohõ saha ni tuhutuya mûsa yũhũre Apolo gãhũre: “Tiquina Cristore dahra cohteyequina ijire. Sa ye masa tiquina masiedarire Cohãcjũ yere buheyequina ijire”, ni, tuhutuya mûsa usãre. ²Dahra cohteyequinare tiquina puhtoro tiquiro dutiriro saha ye cohtero cahmene tiquinare. Yũhũ gãhũre sata yero cahmene Cristore. ³Sa ijiepegũta yũhũre mûsa yahu wajaepegũta sa tuhutu cjã yũhũ. Apequina puhtoia yũhũre tiquina yahu wajaepegũta sa tuhutu cjã yũhũ. Yũhũ yerire ihñana “Ahri quehnoañe ijire. Ahri ñañe ijire”, ni masiedare mûsa. Yũhũ gãhũ masuta ijiaja. Sa yegu yũhũ yerire quehnoano masi pehoeraja yũhũ gãhũ. ⁴“Cristo yere yũhũ yũhũdũdũcari yũhũre mariedare”, ni tuhutumaja yũhũ. Yũhũ ohõ saha ni tuhutuepeguta buhiri tiboaga yũhũ. Mari puhtoro Cristo dihita yũhũ yerire ihñano, quehnoano masine. ⁵Sa yena mari puhtoro tiquiro tojoa tato pano masare ñano ni yahu wajaeracãhña mûsa. Tiquiro tojoa taro masa tiquina yerire, panopu apequina tiquina masiedarire Cristo masigũ yerota. Sa yero mari ye duayere, mari tuhutuyere tiquiro masigũ yerota. Sa yero tiquiro yere yeriquinare “Mûsa quehnoano yeri”, ninota Cohãcjũ.

⁶Yũhũ acaye, yũhũ Apolo mehna usã buherire yahuu yũhũ, mûsare buhegu tagu. Sa ni yahuu yũhũ Cohãcjũ tiquiro yere tiquina ojoari pũpu tiquiro nidiro sahata mûsa yeducuatire. Sa yena mûsa mehna cjenare ihcãno saha cahme ño peoya. Ihcãquioreta ño peeracãhña. ⁷Mûsa pehe apequina yũhũoro quehnoana ijierare. Masi yũhũdũdũcana ijierare mûsa. Cohãcjũ mûsare tiquiro ohori dihitare cõore mûsa. Sa yena mûsare tiquiro yahuri dihitare masine mûsa. ¿Mûsa esa tuharo cõona, mûsa esa tuharo masina ijierapenata, ðuhse yena “Masi pehona ijiaja”, nijari mûsa? Sa nina “Cohãcjũ usãre ohoerari. Sa yero usãre yahuerari”, niboriro saha yere mûsa.

⁸Mûsa pehe “Cohãcjũ yere masi pehoaja usã. Usãre yabe boro ðuhsaerare”, nimene mûsa. Sa yena mûsa cahapu usã ijieragũ mûsa ohõ saha ni tuhutumene:

“Puhtoa yero saha masina ijiaja usã”, ni tuhutumene musa. Potota Cohãcjüre masi pehona puhtoa yero saha masina musa ijigũ musare quehnoa yuhduaboaga. Musa sa ijigũ musa mehna usã gãhũ puhtoa yero saha masina ijiboaga. “Masina ijiaja usã”, ni tuhotuna, quehnoa yuhduaro ni tuhutumene musa. ⁹Ohõ saha ni tuhoutuaja yuhũ pürita: Usãre Jesu tiquiro yere buhe dutiro cüno, ijipihtiequina jji bato tiri cjã curua cüri usãre. Tiquina wejẽ dutinohriquina yero saha ijanare cüri usãre. Masa tiquina cahacjẽna yero saha ijiaja usã. Ahri yehpa cjẽna masa, angele gãhũ cahacjẽna yero saha ihñare usãre. ¹⁰Cristo yere usã buhegũ ihñañe “Tũho masieñequina ijire”, nine masa usãre. Sa Cristo yere usã yegũ ihñañe, usãre ihña tuhtire. Musa pehe quehnoa yuhduaro Cristo yere masina ijiajari musa. “Cohãcjüre wacũ tutueyequina ijire”, ni tuhutumene masa usãre. Musa pehe quehnoa yuhduaro wacũ tutua yuhduana ijiajari. Musa pehere masa ño peore. Usã pehere masa ne ño peorare. ¹¹Usã pehe yojorũre ñano yuhduana, tũua ahbana, aco wũona, ñano suhti mariena, wuhuse mariena ijiaja. Sa ye apequina usãre ño peora, usãre ñano yere. ¹²Sa yena usã tutuaro dahraja. Sa yena apequina usãre tiquina ñano yahuducuepegũta usã pehe tiquinare “Quehnoano ijiaja”, niaja usã. Sa yena apequina usãre ñano tiquina yepegũta sa tuhutu cjã usã. ¹³Sa yena “Ñano yeyequina ijire”, usãre tiquina niepegũta usã pehe quehnoano mehna tiquinare yuhũtiaja. Sa ye panopũ, yojorũ gãhũre ñañe wete yero saha masape cururi jji bato tiri curua cjẽna yero saha ihñare masa usãre.

¹⁴⁻¹⁵Musare quehnoañe buheyere buhe mũhtagũ musa pacũ yero saha wahaũ yuhũ. Peyequina musare Cristo yere buheyequina tiquina ijiepegũta musare buhe mũhtarigũ ihcũta ijiaja yuhũ. Sa ijigũ musare buẽ tigũ yegũ tagũ ahrire ojoagũ niedũ yuhũ. Yuhũ pohñare, yuhũ cahĩnare yuhũ dutiboriro saha musare quehnoano mehna dutigũ tagũ ahrire ojoagũ yuhũ. ¹⁶Sa yegũ ahrire musare tutuaro mehna dutigũ tagũ niaja yuhũ. Yuhũre ihña cuña musa.

¹⁷Ahrire ye dutigũ tagũ musa cahapũ Timoteore ohou. Tiquiro yuhũ macũ yero saha ijiriquiro yuhũ cahĩniquiro mari puhutoro Jesu yaquiro ijire. Sa yero Cristo yere yeducure tiquiro. Cristo yere mari yeatire ijipihtiequina Jesu yequina cahapũ buhei yuhũ. Timoteo tire musare wacũducugũ yerota. Sa yegũ Cristo yere yuhũ yeriro sahata musa ihña cũato saha Timoteore ohou yuhũ. ¹⁸Timoteore yuhũ ohogũ ihquẽquina musa mehna cjẽna puhtoa jji duayequina ohõ saha nine: “Pablo marine cuero, mari cahapũ ahtasi”, ni tuhutumene tiquina. ¹⁹Cohãcjũ cahmegũ musa cahapũ mianogãta esautja. Sa esagu puhtoa jji duayequinare musa mehna cjẽnare Cohãcjũ ye tutuayere tiquina cuogũ masigutja yuhũ. Sa yegũ tiquina sa ni maca cãri gãhũre masigutja yuhũ. ²⁰“Cohãcjũ usã puhutoro ijire”, mari ni yahuepegũta tiquiro yere mari yeragũ ti mari niñe dũhseati ijierare. Cohãcjũ tutuaye mehna tiquiro cahmeno saha ye masiaja. Ti ihyo waro ijierare. ²¹¿Musa cahapũ musare buhiri dahreacjũ musare tuhtiacjũ yuhũ wahagũ cahmeajari musa yuhũre? ¿O musare cahĩgũ musare bucuegu yuhũ wahagũ cahmeajari musa yuhũre? ¿Dũhse ijigũ yuhũ wahagũ cahmeajari musa?

Corinto cjēna tiquina wuana tirire yahuahye Pablo

5 ¹Potota ohō saha quiti tire usāre apequina: Ihcāquiuro mūsa mehna cjūno tiquiro mūonore wuana tiñohti. Sa ni yahuri masa usāre. Apequina pehe Cohācjüre cahmeeñequina ijiepetata tiquina pehe sa yerare. ²Mūsa mehna cjūno tiquiro sa yepegūta mūsa pehe “Quehnoana ijiaja usā”, ni tūhotumene. ¿Dūhse yena tiquiro ñano yeyere masiepenata bujua witerajari mūsa? Sa yena sa ñano yeriquiurore mūsa mehna Jesu yequina mehna ijiriquiurore cohāña mūsa. ³⁻⁴Yūhū mūsa mehna ijierapegūta yūhū wacūñepū mūsa mehnata ijiaja yūhū. Sa yegū mūsa mehna ijigū yūhū niboriro saha ñano yeriquiurore tiquiro sa ñano yeri buhiri buhiri dahre duti tuhasaja yūhū. Jesu tiquiro dutiro mehnata sa ye dutiaja. Sa yena mūsa cahmecoana yūhū wacūñe mehnapū mūsa mehna yūhū ijigū mari pūhtoro Jesu tiquiro tutuaye mehna tiquiurore ñano yeriquiurore cohāna, ohō saha niña: ⁵“Watīno tiquiro cahmeno saha mūhūre yecūnahdo”, niña tiquiurore. Sata niña tiquiurore ñañene tiquiro tutuaro cahmeñene tiquiro duhuatire. Mūsa sa cohāgū tiquiro ñano yūhdūrota. Mari pūhtoro Jesu tiquiro tojoa tati deco ñano yeriquiro Jesu mehna tiquiro quehnoano yūhduatire yojopūre tiquiurore sa niña.

⁶“Quehnoana ijiaja usā”, niepenata ñano yena niaga mūsa. Ñano yeriquiurore mūsa sa ihña cāna, ti ñañene mūsa ijipihtina piha pihtia wahanata. Pāre pugū yeye trigore ti quehnoano sehsaro saha ti ñañe mū sare piharo quehnoano sehsaa waharota. ¿Tire masiedajari mūsa? ⁷Yūhū acaye judio masa pascua ijigū ovejare wejē, ujūa mūo, Cohācjüre ño peore. Sata oveja tiquiro yariariro saha Cristo mari ñañe buhirire yariaa wahahye. Tiquiro sa waharire masina mūsa pehe ñano yeriquiurore mūsa mehna cjūnore cohāña ti ñañe mū sare “Pihari” nina. Mūsa ñañe yerire cohā tuhasari Cristo. Sa yena ñano yeriquiurore cohāña “Pari turi ti ñañene pihari”, nina. ⁸Pāre pugū yeye trigore ti sehsariro saha panopū ñañene ihña cū, ye pihtirina ijimi mari. Sa yena pascua bose decopū pāre pugū yeye marieno pāre tiquina ihyariro saha mari gūhū ñañene cahmeno marieno ñano yero marieno ijihna mari. Panopū mari ñañene yeriro saha yeracūhna. Sa yena potota quehnoano tūhotuye mehna, quehnoañene yeihna.

⁹Mū sare yūhū ojoari pūpūre Jesu yaquiuro tiquiro ijiepegūta sa wuana tiducuriquiurore ne piti ti dutierami. ¹⁰Sa nigū wuana tiyequinare, apequina yere tutuaro cahmeeñequinare, yaqueyequinare, “Cohācjū ijire”, tiquina niñe queoyere ño peoyequinare Jesu yequina tiquina ijieragū “Tiquina mehna ijieracāhña”, niedaja. Ahri yehpapū sa ijieyequina marieno Jesure cahmeeñequina marieno mari dihita iji masiedaja. Ijipihtiropūre ijire tiquina pehe. ¹¹Sa yegū mū sare ojoagū ohō saha dutimi: Mūsa mehna cjūno “Jesu yaquiuro ijiaja”, nidiquiro ijieperota numino mehna ñano yeriquiro, apee borore tutuaro cahmediquiro, “Cohācjū ijire”, tiquina niñe queoyere ño peoriquiro, ñano quiti yeducuriquiuro, queheriquiro, yaqueriquiro tiquiro ijigū tiquiurore piti tieracāhña. Sa yeriquiro “Jesu yaquiuro ijiaja”, nidiquiro ijigū tiquiurore piti tieracāhña. Sa yena sa yeriquiro mehna ihyeracāhña. ¹²Sa yegū Jesu yequina ijieyequinare tiquina ñañe yeri

buhirire buhiri dahre dutirigu ijieraja yuhũ. Sa yuhũre yeraro cahmene. Yuhũ sa niepegũta m̃sa mehna cahmecoañequina Jesu yequina m̃sa basi m̃sa yerire ihñana, masino cahmene m̃sare. Sa ihña cãedaro cahmene. Sa yena tiquina ñano yegũ ihñana m̃sare buhiri dahrero cahmene tiquinare. ¹³Jesu yequina ijieyequina pehere Cohãcjũ pehe buhiri dahrerota. Sa yena m̃sa pehe m̃sa mehna cjñore ñano yeriquirore buhiri dahrena tiquiore cohãña.

Jesu yequinare yahusãrire yahuahye Pablo

6 ¹¿M̃sa basi cahme ihña tuhti yahusã duana dahse ijiro boro Jesu yequina ijieyequina cahapũ m̃sa acayere Jesu yequinare yahusãna wahajari? Jesu yequinare m̃sa mehna cjẽnare yahusã duana apequina Jesu yequinare tire yahuro cahmene m̃sare. Sa ye Jesu yequinapũ beseahro. ²Pihtiri deco ijigũ mari Jesu yequina pehe masa ijipihtiequina tiquina yerire ihñana besenata mari tiquinare. ¿Tire masiedajari m̃sa? Sa yena pihtiri deco ijigũ masa ijipihtiequinare beseatina ijina, yojopũ gũhũre bese masiaja mari. Sa yena yojopũre ihyo ijieyegã buhiri gũhũre bese masiaja mari. ³Angele tiquina yerire ihñana tiquina gũhũre besenata mari. ¿Tire masiedajari m̃sa? Mari sa beseatina ijina potota ti yuhduoro yojopũ gũhũre Jesu yequina tiquina yerire ihñana bese masiaja mari. ⁴¿Sa yena dahse yena m̃sa mehna cjẽnare yahusã duana Jesure cahmeeñequina cahapũ ihyo ijieyegã buhirire yahusãna wahajari m̃sa? ⁵Ahrire nigũ niãja m̃sa queoro yerarire m̃sa bujua witiatire. ¿M̃sa mehna cjẽnare m̃sa cahme dase tini wiagũ m̃sare yahuatiquiro m̃sa mehna cjũno quehnoano masiniquiro mariedajari? Ijire. ⁶Sa ijiepegũta m̃sa mehna cjũno Jesu yaquiro apequiro Jesu yaquirore yahusã duaro Jesu yequina ijieyequinare yahusãno wahare.

⁷M̃sare beseyequina pũtoã cahapũ m̃sa mehna cjẽnare yahusãna Cohãcjũ ye pehere yuhduucana nine m̃sa. Apequiro m̃sa mehna cjũno m̃sare ñano tiquiro yegũ sa tuhotu cãboaga m̃sa. Jesu yequina ijieyequinare m̃sa yahusãto pano m̃sa acayũrore m̃sa sa tuhotu cãgũ quehnoa yuhduaboaga. Jesu yaquiro m̃sare tiquiro yaquegũ tiquiore m̃sa yahusãto pano tiquiro yaquerire m̃sa sa tuhotu cãgũ quehnoa yuhduaboaga. ⁸M̃sa gũhũ sa ijinata ijire. Apequinare ñano yere m̃sa. Sa yena yaquere m̃sa. Sa yena apequina m̃sa mehna cjẽna Jesu yequina tiquina ijiepegũta tiquinare ñano yena, yaquere m̃sa.

⁹Sa yeyequina Cohãcjũ pũthoro ijiropũre uhmũsepũre waha masiedare. ¿Tire masiedajari m̃sa? Ni mehoñene tuhotueracãhña m̃sa. Mari pũthoro ijiropũ ne wahasi ohõ saha yeyequina: Wũana tiyequina, “Cohãcjũ ijire”, tiquina niñe queoyere ño peoyequina, numia mehna ñano yeyequina, um̃a mehna ñano yeyequina numia, um̃a sehvaro tiquina pagũri mehna ñano yeyequina, numia sehvaro tiquina pagũri mehna ñano yeyequina numia, ¹⁰ni meho ehmañequina, apequina yere tutuaro cahmeeñequina, queheyequina, masare ñano tuhtiequina, yaqueyequina, ne Cohãcjũ pũthoro ijiropũre uhmũsepũre waha masiedare. ¹¹Panopũre m̃sa gũhũ sa yerina ijimedi. Sa yemedina m̃sa ijiepegũta yojopũre m̃sa ñano yerire cose tuhasari Jesucristo

pehe. Sa tiquiro cosenohrina mûsa ijigũ tiquiro yequina ijiatinare yeri Cohãcjũ mûsare. Sa yero “Quehnoana ijire”, ni ihñare mûsare tiquiro. Sata yere mûsare mari pũthoro Jesucristo, Espíritu Santo gũhu tiquina tutuaye mehna.

Mari paguri Cristo ye paguri ijire

¹²“Yũhu cahmeno saha ye masiaja yũhu”, nine ihquẽquina. Sata ijire. Yũhu gũhu sa nidigu ijiepeguta tire yegu apequinare yedohorigu ijieraboaga yũhu. Yũhu cahmeno saha ye masiaja. Sa ye masiepeguta ihquẽ tahari sa yegu ijigu duhu masiedaboaga yũhu. Sa yegu tire pari turi yesi yũhu, “Duhu masiedaboaga”, nigũ. ¹³Ohõ saha nine mûsa: “Ijipihtiye ihyaye mari paa cjẽ ijati ijire. Sa yero mari paa ihyaye pose tiati paa ijire”, nine mûsa. Ti ijirota ijire. Sa ijieperota came Cohãcjũ pehe mari ihyayere mari paa gũhure pihitia wahagũ yerota. Sa ye mari ihyaye ihyo warota ijiro nine. Ihyaye mari paa cjẽ ijati ijire. Sa ijieperota mari paguri numia mehna ñano yeati paguri ijierare. Mari paguri pehe mari pũthoro Cristo ye paguri ijire nine. Sa yero mari pũthoro pehe mari pagurire quehnoano yeatiquiro ijire. ¹⁴Sa yero Cohãcjũ tiquiro tutuaye mehna mari pũthoro Cristore masoahye. Sa tiquiro yeriro sahata mari gũhure masonota tiquiro.

¹⁵¿Sa yena mûsa paguri Cristo ye paguri ijigũ masiedajari mûsa? ¿Ti sa ijigũ Cristo ya pagũ mehna wũana tiricoro mehna mari ñano yegũ quehnoajari? Quehnoaedare. ¹⁶Wũana tiricorore ñeheniquiro tiquiro pagũ pehe ticoro ya pagũ mehna ijiro, ihcã pagũ yero saha ijire. ¿Tire masiedajari mûsa? Sata ni ojoahye Cohãcjũ yere tiquina ojoari pũpũ: “Tiquina pũaro ijiepetata ihcã pagũ yero saha wahare”, ni ojoahye. ¹⁷Mari pũthoro Jesu tiquiro yaquiro masũno mehna ijiro nine. Sa yero masũno mari pũthoro mehna pũaro ijiepetata ihcã pagũ yero saha ijire.

¹⁸Sa yena wũana tieracãhña. Tire mûsa yabiro saha tire yeracãhña. Apeye ñañene mari yena mari pagure dojomehnedaja. Wũana tiriquire pehe tiquiro pagure ñano dojomehnene. ¹⁹Espíritu Santore marine ohoi Cohãcjũ. Sa yero mari paguri mehna ijire Espíritu Santo. ¿Tire masiedajari mûsa? Sa ye mûsa paguri, mûsa jeripohnari gũhu mûsa ye waro ijierare. ²⁰Mûsa ñañe buhirire buhiri dahre tuhasari Cristore. Sa yena tiquiro yequina waro ijire mûsa. Tiquiro yequina ijina mûsa paguri mehna Cohãcjũ tiquiro cahmeno sahata yeya. Sa yena Cohãcjũ ño peona nine mûsa. Sa yena apequina gũhure tiquire ño peogũ yena nine.

Namo tiyere yahuahye Pablo

7 ¹Yojopũre yũhure mûsa sinitu ojoarire yũhu gũhu yũhti cahmegũ tagũ niaja: Masũno namo tieragũ quehnoare, yũhu ihñagũ. ²Ti sa ijiepeguta apequina umma pehe namo tiahro apequina numia mehna tiquina “Ñano yeari”, niñe. Sa ye ihquẽ numiata manũ tiahro apequina mehna tiquina “Ñano yeari”, niñe. ³⁻⁴Manũ tiricoro pagũ ticoro ya pagũ dihita ijierare. Ticoro manũno ya pagũ gũhu ijire. Ticoro manũno gũhu tiquiro pagũ tiquiro ya pagũ dihita ijierare. Tiquiro namono ya pagũ gũhu ijire. Sa yena mûsa umma pehe mûsa namosãnumiare quehnoano sũoya. Sa yena mûsa numia gũhu mûsa manũsummare “Yũhu pagure

piheracãhña”, niedacãhña. ⁵Sa ijiepegũta Cohãcjũre puaro mũa sini duana “Meheñe decorigã yũhũ mehna ijieracãhña. Cohãcjũre siniihna”, ihcãno mehna sa nina, sa ye masine mũa. Mũa sa nidi bato mũa iji muhtariro saha ijiducuya tja, Satana musare “Ñano ye dutiari”, nina. “Apequina mehna ñano yeboaga”, nina, mũa basi piti ti duhueracãhña. Mũa iji muhtariro saha ijiducuya tja.

⁶Ahrire musare yojopũ yũhũ nidire nigũ musare dutiye waro mehna niedaja. Sa yahugũ niaja mũa yeatire mũa masiatire. ⁷Ijipihtina mũa yũhũ yero saha namo tiena mũa ijigũ quehnoaboaga yũhũre. Sa iji duepenata mari ijipihtina ihcãno saha ijieraja. Ihquẽquinare namo ti dutire Cohãcjũ. Sa yero tiquiro ihquẽquinare namo ti dutierare.

⁸Sa yegũ namo marienare, manũ marienare, wape wiha numia gũhũre ohõ saha niaja musare: Namõ mariena, manũ mariena iji masina, sata iji cãhña yũhũ yero saha. ⁹Sa iji masiedana tutuaro ñañene cahmena, namo tiya. Sa yena manũ tiya. Ñañene mũa tutuaro cahmegũ quehnoaedare musare. Mũa sa tutuaro cahmegũ mũa namo tigũ pũrita quehnoarĩne. Sa yena mũa manũ tigũ gũhũre quehnoarĩne.

¹⁰Mũa namo tinare, manũ tina numiare ohõ saha dutiaja. Yũhũ sa niepegũta yee dutiye waro ijierare ahri. Mari puhtoro Cristo ahrire dutire: Mũa numia pehe mũa manũsumũare cohãedacãhña. ¹¹Mũa manũsumũare cohãna, manũ mariena numia tojoaya. Sa tojoerana pari turi mũa manũsumũa mehna quehnoano ijiya tja. Sa yena mũa gũhũ umũa mũa namosãnumiare cohãedacãhña.

¹²Sa yegũ mũa gũhũre apequinare ohõ saha niaja yũhũ. Mari puhtoro tiquiro dutiye ijierare ahri. Yũhũ pehe ohõ saha niaja musare: Ihquẽquina mũa mehna cjẽna Jesu yequina pehe Jesure cahmeeñequina numiare namo tiriquina ijire. Sa ye tiquina namosãnumia tiquina mehna tojoa duagũ tiquina numiare cohãedacãhdo tiquina. ¹³Sa ye ihquẽquina mũa mehna cjẽna numia Jesu yequina numia Jesure cahmeeñequinare manũ tiriquina numia ijire. Sa ye tiquina manũsumũa tiquina numia mehna tojoa duagũ tiquinare cohãedacãhdo. ¹⁴Mũa manũsumũa Jesure cahmeeñequina ijiepegũta Jesu yequina numiare tiquina namo tigũ, Cohãcjũ quehnoañequina yero saha ihñare tiquinare. Sa yena mũa umũa pehe Jesu yequina mũa ijigũ mũa namosãnumia Jesure cahmeeñequina numia ijiboaga. Tiquina sa ijiepegũta mũa mehna tiquina numia manũ tigũ Cohãcjũ quehnoañe numia yero saha ihñare tiquina numiare. Tiquiro sa ihñedagũ mũa pohna Jesure cahmeeñequina pohne yero saha ihñaboaga Cohãcjũ. Sa yero tiquina pohne gũhũre quehnoañequina yero saha ihñare Cohãcjũ. ¹⁵Sa ye mũa umũa pehere mũa namosãnumia Jesure cahmeeñequina numia musare cohã duaye, sata yeahro. Mũa manũsumũa gũhũ sa cohã duaye, sata yeahro. Quehnoano mari ijigũ cahmene Cohãcjũ. Sa yero tiquina numia Jesu yequina ijieye numia musare cohã duagũ “Tiquina numia mehna ijiniña”, ni, dutierare Cohãcjũ. ¹⁶Tiquina namosãnumia Jesu yequina numia pehe quehnoano yegũ ihñañe camerũ tiquina manũsumũa Jesure cahmeboaga.

Sa cahmegũ Cohãcjũ tiquinare pecapũ wahaboriquinare yũhdũorota. Sa ye tiquina manusũmũa Jesu yequina pehe quehnoano yegũ ihñañe camepũ tiquina namosãnumia Jesure cahmeboaga. Sa cahmegũ Cohãcjũ tiquina numiare pecapũ wahaboriquina numiare yũhdũorota. Sa Jesure cahmeboriquina tiquina ijiepegũta potota Jesure tiquina cahmeatire masiyuro basioerare musare.

¹⁷Sa yena ijipihitina musa mari pũhtoro Cristo musare tiquiro iji dutiriro sahata yeya. Sa yena Cohãcjũ musare tiquiro cũrre yeya musa. Tire ijipihitiyequina Jesu yequinare sa ye dutiducuaia yũhũ. ¹⁸Jesu yequina musa ijianto pano cuhnuccũũ sohtoa cahserogãre yũhre nena ijina, tire ihña yabieraçãhña. Sa yena Jesu yequina musa ijianto pano cuhnuccũũ sohtoa cahserogãre yũhre nedarina ijina yojopũ gũhũre sata ijiducuya. ¹⁹Yojopũre ti cahserogãre yũhre nedina musa ijigũ duhseati ijierare. Tire yerarina musa ijigũ gũhũre duhseati ijierare. Sa ijiepegũta Cohãcjũ dutiyere mari yegũ ti pũrita ihyo waro ijierare. ²⁰Sa yena Cohãcjũ Jesu yequina musare tiquiro cũri pje musa ijiriro sahata tojoaya. ²¹Jesu yaquiro mũhũ iji dũcato pano apequiro cahacjũ mũhũ ijigũ quehnoanota. Sata tojoaya. Mũhũ pũhtoro mũhũre tiquiro wio duagũ pehere wijiaya mũhũ. Mũhũ wijiagũ quehnoanota mũhũre. ²²Sa yero mari pũhtoro Jesu yaquiro ihcãquiro ijiro masũno cahacjũno ijieperota Jesu tiquiro yũhdũoriquiro ijire. Sata apequiro mari pũhtoro Jesu yaquiro ijiro, masũno cahacjũno ijieraperota Jesu cahacjũno ijire tiquiro gũhũ. ²³Mari ñañe buhirire buhiri ti tuhasahye Cristo. Sa yena tiquiro dihitaro potota musa pũhtoro waro tuhotuya musa. Apequina musare tire tiquina ye dutieragũ tiquinare tuhoeracãhña. ²⁴Sa yena yũhũ acaye, Jesu yequina ijiatiquina Cohãcjũ musare tiquiro cũri pje musa ijiriro sahata tojoaya. Sa tojoana Cohãcjũ mehna çjana ijia.

²⁵Yojopũre namo marienare, manũ mariena numia gũhũre yahu duaja musare. Mari pũhtoro ahrire “Ohõ saha niña”, niedare yũhũre. Yũhũre tiquiro paja ihñagũ yũhũre tiquiro yedohogũ tiquiro cahmeno sahata yeducurigũ ijiaja yũhũ. Sa ijirigũ ijigũ ahrire quehnoano yahutja musare. ²⁶Yojopũre musa ñano yũhdũna niaga. Sa yena musa namo mariena gũhũ, manũ mariena gũhũ musa tojoagũ quehnoanota, yũhũ tuhotugũ. ²⁷Namo mariena, manũ mariena numia musa ijina sata tojoaya. Sa yena musa pehe namo tina, manũ tina numia gũhũ sata tojoaya. ²⁸Namo tina ñano yerare musa. Sa yena musa nuhmia manũ tina, ñano yerare musa gũhũ. Sa yena namo tina, manũ tina numia musare wape cũoro tojoarota. Sa yegũ musare “Sa wape tiari”, nigũ “Namo mariena, manũ mariena numia tojoaya”, niaja yũhũ.

²⁹Yũhũ acaye, ahrire musare yahugũ niaja. Cristo ahri yehpapũ tiquiro tojoa tato mehenogã dũhsare. Sa ye yojopũre namo marieñequina Cohãcjũ cahmeno saha tiquina quehnoano ye masino sahata quehnoano yero cahmene namo tiyequina gũhũre. Sa ye manũ tiyequina numia gũhũre sata Cohãcjũ tiquiro cahmeno saha quehnoano yero cahmene. ³⁰⁻³¹Ahri yehpa yojopũ ijiro saha camepũ ijisi. Camesa pihtia waharota. Sa pihtiatu yehpa ijigũ yojopũre mari ñehe quea utiye, mari bucueye, mari cũoye pihtia waharota. Sa ye ti ihyo waro ijire. Cohãcjũ yere yeye pehe ihyo waro ijierare. Sa ye ahri yehpa

cjêne cwoyequina, cwoyequina yero saha ijahro. Ahri yehpa cjêne pajiro tūhotueraro cahmene. Ahri yehpa yojopū ijiri yehpa camesa pihitia waharota.

³²Musa ñano yūhdueragū cahmeaja yūhū. Sa yegu musa pajiro musa tūhotueragū gūhūre cahmeaja. Namō mariediquiro Jesu yaquiro ijiro Jesu yere wacūducure. Sa wacūducuro Jesu cahmeñene tutuaro ye duare. ³³Namō tiriquire pehe tiquiro namono cahmeñe pehere tutuaro ye duare. Sa yero ahri yehpa cjêne pajiro tūhoture. ³⁴Sa yero tiquiro puarore ye duare. Jesu cahmeñene, tiquiro namono cahmeñe gūhūre tiquiro ye duare. Sa yero bācūoro manū mariedicoro ijiro, ticoro mari pūhtoro Jesu cahmeñene tutuaro ye duare. Nuhmino gūhū sata ye duare. Sa ye duaro ticoro tutuaro Cohācjū yacoro iji duare. Manū tiricoro pehe ahri yehpa cjē pehere ticoro manūno cahmeñe pehere tutuaro ye duare. Sa yero ahri yehpa cjêne pajiro tūhoture.

³⁵Ahrire mūsare nii niaja mūsare yedohogū tagū. Tutuaro dutiyere mūsare cū dueraja. Sa cū duerapegūta quehnoano musa yegū cahmeaja. Sa yegu Jesu mari pūhtoro yere musa tutuaro ye duagū cahmeaja yūhū.

³⁶Musa mehna cjūno tiquiro cahmedicoro bācūoro wahagū ihñano ticorore namo tiaho. “Sata yero cahmene”, ni tūhoturo, namo tiaho. Sa yero ticorore namo tiro ñano yero niedare. ³⁷Apequiro pehe tiquiro cahmedicorore “Yūhūre namo tiro cahmene”, ni dueraro, tiquiro cahmediro sahata yeahro. Tiquiro namo ti dueragū, quehnoanota. Quehnoano yero nine. ³⁸Sa yero tiquiro cahmedicorore namo tiriquire gūhū quehnoano yere. Sa yero yojopūre ticorore namo tieriquiro pehe apequiro yūhdūoro quehnoano yere.

³⁹Manū tiricorore ticoro manūnore cohā dutierare Cohācjū. Tiquiro sa cohā dutierapegūta ticoro manūno tiquiro yariari bato ticoro apequiro mehna ticoro cahmediquiro mehna manū ti masine. Ticoro manū tiriquire Jesu yaquiro ijiro cahmene tiquiro. ⁴⁰Ticoro manū mariedicoro tojoaro, manū tiricoro yūhdūoro quehnoano bucuericoro ijirota ticoro. Sata ni tūhotuaja yūhū pehe. Cohācjū yaquiro Espiritu Santore cwoyū ijiaja. Yūhū sa cwoyū ijigū masina, ahri yūhū yahurire masiña musa.

“Cohācjū ijire”, tiquina niñe queoyere ño peo, ihyayere duhu peoahye masa. Ti ihyayere yahuahye Pablo

8 ¹Yojopūre “Cohācjū ijire”, tiquina niñe queoyere ño peo, tiquina duhu peori ihyayere yahu duaja. Ijipihtina musa ti borore “Masaja”, ni tūhoture musa. Sa ni tūhotuna “Apequinare masi yūhdūducaja”, ni tūhotumene musa. Sa ni tūhotuna apequinare yedohoerare musa. Apequinare cahina tiquinare yedohore musa. Sa ye masiñe yūhdūoro apequinare cahine pehe ihyo waro ijierare. ²“Masi peho cjā”, nina ijina, Cohācjū quehnoañene tiquiro masi dutiyere masiedariaga musa. ³Sa ijiepegūta Cohācjūre musa cahigū mūsare masine tiquiro. Sa yena tiquiro yequina ijire musa.

⁴“Cohācjū ijire”, tiquina niñe queoyere ño peo, tiquina ihyayere duhu peore. Ti ihyayere mūsare yahutja: Ti queoye ne dūhseati ijierare. Potota ti queoye

jeripohna mariedare. Cohăcĵŭ pehe ihcăquirota ijire. Apequina cohămana mariedare. Ahrire masiaja mari. ⁵⁻⁶“Peyequina cohămana ijire. Tiquina mari puhtoia ijire”, ni tuhotumene masa. Sa yero uhmusepu, ahri yehpapu gŭhure “Cohămana”, tiquina niŭequina ijiepegŭta mari pehere ihcăquirota ijire Cohăcĵŭ. Tiquiro mari Pacu ijipihiyere bajumehnediquiro ijire. Sa yero tiquiro yequina ijiatina yeahye tiquiro marine. Sa yero mari puhtoro Jesucristo ihcăquirota ijire. Tiquiro ijipihiyere mari Pacure ye basariquiro ijire. Tiquiro yequina ijiatinare yeahye tiquiro marine. Sa yena tiquiro mehna sa ijiducunata mari.

⁷Yŭhu nidiro saha ijiepegŭta apequina Jesu yequina tire masiedare. Panopu tiquina “Cohăcĵŭ ijire”, tiquina niŭe queoyere “Catiyequina ijire”, ni tuhotuducumahye. Ti pĵepure sa yeriquina ijie yejojopu gŭhure ti queoyere ņo peo, tiquina duhu peo ihyayere “Cohămana ye ihyaye ijire”, ni tuhotumene. Sa ye ti ihyayere ihyaye, “Mari ņano yena niaja”, ni tuhotumene. Tire tiquina yerire quehnoano masiedaye, sa ni tuhotumene. ⁸Ti ihyayere mari ihyagŭ mari ihyeragŭ gŭhure Cohăcĵŭ marine “Quehnoaŭequina ijire”, ni ihŭedare. Sa ye ti ihyayere mari ihyagŭ ihyo warota iji căhno nine ti ihyaye. Mari tire ihyana ņano yeraja. Ti ihyayere mari ihyeragŭ gŭhure ihyo warota iji căhno nine. Mari ihyerana apequina yŭhduro quehnoana ijieraja mari gŭhu. ⁹⁻¹⁰Sa ijiepegŭta quehnoano yeya masa. Ti ihyayere ihyarina masa ijigŭ apequina masare “Masiaja”, ninare ihŭa cŭ ihyaboaga. Sa ihŭa cŭ ihyaye tiquina yerire quehnoano masiedaye, “ņano yena niaja mari”, ni tuhotueta tiquina gŭhu. Tiquina sa ni tuhotugŭ tiquina pehere ņano yegŭ yena niaga masa. Sa yena quehnoano yeya masa. ¹¹“Mari ti ihyayere mari ihyagŭ quehnoanota marine”, masa ni tuhotuna ijina apequina quehnoano masieŭequinare ņano yegŭ yeboaga masa, masare tiquina ihŭa cŭgŭ. Sa yeriquina ye ijati gŭhure yariahye Cristo. Sa yena Cristo yequinare masa acayere ņano yegŭ yena niboaga masa. ¹²Quehnoano masieŭequinare Cristo yequinare masa ņano yegŭ yena, Cristo gŭhure ņano yena nine masa. ¹³Sa yegŭ ti queoyere ņo peo, tiquina duhu peo ihyayere yŭhu ihyagu Cristo yequinare ņano yegŭ yegŭ niboaga yŭhu. Jesu yequina ņano yegŭ cahmedaja. Sa yegŭ “Yŭhu tiquinare ņano yegŭ yeari”, nigŭ ti ihyayere ne pari turi ihyasi yŭhu.

Pablo Jesu cŭriquiro tiquiro ijiyere yahuahye

9 ¹Jesu tiquiro yere buhe dutiro cŭrigu ijiaja. Sa yegŭ apequina tiquiro cŭriquina tiquina yero saha ye masiaja yŭhu gŭhu. Jesu cŭriguta ijiaja yŭhu gŭhu. Mari puhtoro Jesure ihŭariguta ijiaja yŭhu. Sa yena Jesu yere yŭhu buhegŭ masa pehe tire quehnoano tuhona tiquiro yequina wahare masa. Sa yena Jesu cŭrigu yŭhu ijiyere masi tuhasare masa. ²Apequina yŭhure yahu wajaye “Jesu cŭriquiro ijierare”, niboaga. Tiquina sa niepegŭta masare yŭhu buheri bato Jesu yequina wahana, “Jesu cŭriquiro ijire”, ni, yŭhure masi tuhasare masa. Sa yena apequina yahu wajaepgŭta masa pehe tiquiro cŭrigu yŭhu ijie tiyere masine.

³Yŭhure yahu wajayequinare ohŭ saha ni yŭhtiitja. ⁴Masare yŭhu buheri bato yŭhu ihyatire yŭhu sihniati gŭhure yŭhure ohoro cahmene masare. ⁵ŶSa

yegu namo tigu ijigu yuhu namono Jesu yacoro ticoro ijigü ticoro mehna tini masiedaboagari yuhu? Apequina Jesu cüriquina, Jesu bahana, Pedro gühu tiquina namosãnumia mehna tiquina tinidiro sahata yuhu gühu tini masiboaga. Yuhu sa tinigü yuhu namo tigu ijigü ticoro gühure ihyayere ohoboaga musa. ⁶Yuhu Bernabé mehna musare quehnoañe buheyere usã buhepegüta usãre ne apee borogã ohoerari musa. Sa yena usã basita usã ihyatire dahra wapatau usã. ¿Usã dihitare wapataro marieno buhero cahmeajari, musa tuhutugü? ¿Usã sa buhena apeye dahraye pehere duhu masiedaboagari usã? ⁷Ahriquina yuhu queoye mehna yahuatiquina pehe tiquina dahrari wapa wapatare. Ihcãquiro surara dahragü tiquiro pũthoa tiquirore wapa yere. Tiquiro basi wapa yerare. Ihyayere oteriquiro gühu tiquiro oteri dũca tigü tireta ihya masine. Sa yero wapatare tiquiro. Sa yero ovejare ihña ihboriquiro tiquiro nuñequina epẽcore sihni masine tiquiro. Sa yero wapatare tiquiro gühu. ⁸“Tiquina dahrari wapare wapa yero cahmene”, nigü masa tiquina dutiye dihitare musare yahueraja. Cohãcjü dutiyepũ tiquiro nidi gühure musare yahugũ niaja. ⁹Tiquiro dutiyere tiquina ojoari pũpũ ohõ saha ni yahure: “Wecu trigo pjerire tiquiro dahpocãri mehna suhti weriquiro ihya duagü tiquiro dũserore cahmotaeracãhña”, niahye Cohãcjü dutiye. Sa dutiro wecuare nino niedahye. ¹⁰Sa dutiro marine nino niahye marine buhero taro. Wesere seheriquiro gühu ti dũcare nediquina gühu tiquina dahrari bato dũca tiri pje ijigü tiquina wapatare cohtere. Sa yena dahrayequinare tiquina dahrari wapare ohoro cahmene marine. ¹¹Musare Cohãcjü yere quehnoañe buheyere buhei usã. ¿Usã sa buhegü musa pehe usãre ihyayere ohoeraro cahmeajari, musa tuhutugü? Ohoro cahmene. Musã ohogü quehnoaboaga usãre. Sa ijiepegüta musã ohoerari usãre. ¹²Sa ohoerapenata apequina ihyayere musare sinigü tiquina pehere ohore musã. Tiquina musare ihyayere sinigü tiquina yuhũoro usã pehe oho dutiboaga musare.

Sa oho dutiborina ijiepenata usã pehe “Usãre ohoya” ne niedũ. “Cristo ye buheyere musapũ cahmedaboaga” nina, usãre mariedapegüta musare ne siniedũ. ¹³Cohãcjü wuhũpũ dahrayequina ti wuhũpũta tiquina ihyayere nene. Sa ye Cohãcjüre tiquina ño peori altarpũ cohteyequina wahiquire tiquina ujũa mũoriquirore mehenogã ne, ihyari tiquina gühu. ¿Tire masiedari musã? ¹⁴Sa tiquina yeriro saha quehnoañe buheyere buheyequinare tiquina buheri wapare tiquina ihyatire tiquinare ohoro cahmene musare. Sata ye dutiri mari pũthoro Jesu. ¹⁵Sa yegu musare siniborigũ ijiepegüta yuhu ne apee borore siniedũ musare. Sa yegu ahrire yojopũre oja ohogũ apee borore wapa cahmegũ tagũ ojoagũ niedaja. Musare ne wapa cahme dueraja. Yariacjũ ijiepegüta ne wapa cahmesi yuhu musare. Wapa marieno buhegũ tutuaro bucueaja. Sa yegu musare yuhu buheri wapa ne wapata ihyasi.

¹⁶Quehnoañe buheyere buhe dutiro yuhũre cüri Cohãcjü. Tire buheacjũta ijigũ niaja yuhu. Quehnoañe buheyere buheragũ pejesũogũ ijiboaga yuhu. Sa yegu ti buheyere buhegũ “Apequinare masi

yuhduducaja”, niacjü ijieraja yuhü. ¹⁷Quehnoañe buheyere yuhü esa tuharo buhegu yuhü buheri wapa wapa neboaga yuhü. Cohäcäjü yuhüre tiquiro yere buhe dutiro cüri yuhüre. Sa yegü yuhüre tiquiro cürire yegü niaja. Sa buheacjü ijiaja yuhü. ¹⁸¿Tiquiro yere sa buhegu yabe borore wapatajari yuhü? Ohö saha ijire yuhü wapataye: Quehnoañe buheyere buhegu müsare ne apee borore siniedagu wapa marieno ti buheyere buheaja müsare. Yuhü sa nidire masigu bucueaja. Yuhü bucueyeta ijire yuhü wapataye.

¹⁹Ne masa cahacjü ijierapegüta ijipihtiyequina cahacjü yero saha ijiaja yuhü apeqüina masa Jesu yequina tiquina wahatire. ²⁰Sa yegü yuhü acaye judio masa mehna ijigü, tiquina yero saha yeaja yuhü Jesu yequina tiquina wahatire. Cohäcäjü dutiyere Moisere tiquiro cürire ño peorigü ijierapegüta, ti dutiye dihitare ño peoyequina mehna ijigü ti dutiyere ño peoriquiro yero saha ijiaja yuhü. Sata yeaja yuhü tiquina Jesu yequina tiquina wahatire. ²¹Sa yegü Cristo yaquiro ijigü Cohäcäjü dutiyere Moisere tiquiro cürire cohä dueraja. Ti dutiyere cohä duerapegüta ti dutiye marieñequina mehna ijigü ti dutiye marieniquiro yero saha ijiaja. Sata yeaja yuhü Jesu yequina tiquina gühü wahatire. ²²Jesu yere quehnoano masieñequina mehna ijigü tiquina yero saha ijiaja. “Masi pehogü ijiaja”, niedaja yuhü. Sata yeaja yuhü Jesu yequina tiquina gühü wahatire. Sa yegü ijipihtiyequina masa tiquina ijiro saha ijiaja yuhü, ihquëquina Jesu yequina tiquiro yuhdüoriquina tiquina wahatire. ²³Ahrire yeaja quehnoañe buheyere ijipihtiyequina tiquina tuhoatire. Yuhü sa yegü ihñano Jesu tiquiro buheriro saha yuhü gühüre quehnoano yere. Sa yegü masa tiquina ijie tiro saha ijiaja.

²⁴Ohö saha ijire mari queoye mehna buhegü. Oma cohäpeyequina omañe tiquina ijipihtiyequina omare. Tiquina sa oma pihtiepegüta oma tutuariquiro pehe esa mühtare. Sa esa mühtariquiro wapatate. Sa yena tiquina omariro saha müsä gühü Cohäcäjü cahmeñene yeya müsä wapatatire. ²⁵Ijipihtiyequina omañequina tiquina pagure dojomehneñene duhu cã, quehnoano omapore tiquina oma tutuatire. Sa ye tiquina quehnoano omatire queoro ihyaye, queoro carñe, quehnoano yere tiquina. Sata yere tiquina wapatato saha. Sa ye tiquina wapataye püri mehna tiquina yeri behto ijire. Ti behto pehe yoari pje ijierare. Duita ahbaa wahare. Mari pehe Cohäcäjü yere quehnoano buheaja tiquiro yere mari wapatato saha. Ti wapataye pürita ne ahbaerare. ²⁶Sa yegü yuhü ape siepü omariquiro yero saha yeraja. Sa yegü cahmequeperiquiro ape siepü dote maca cãriquiro yero saha yeraja. Sa yegü Cristo yere queoro ye duaja. ²⁷Sa yegü omapeyequina, cahmequepeyequina gühü tiquina pagürire tiquina buheriro saha, quehnoano queoro tiquina yeriro saha yuhü gühü yuhü pagü mehna quehnoañe dihitare yepoaja. Sa yeragu apeqüinare buherigu yuhü ijiepegüta dühseacjü ijieraboaga yuhü pehe.

“Cohäcäjü ijire”, tiquina niñe queoyere ño peo dutierahye Pablo

10 ¹Sa yena yuhü acaye, ahrire masiña müsä. Usã Israe masa ñecusümña mña panorpü cjëna ijipihtiyequina Cohäcäjü ya ehmeo curuare ihña nññü

tã cãa wahahye. Sa wahaye, aco sohãri mare aco pua peheri tojoaducari mahapu wna queheri mahapu tiniñe, pehãa wahahye. ²Sa wahaye, tiquina ijipihitiyequina ehmeo curua mehna aco sohãri ma cje aco mehna Cohãcjũ ye ijiatire wame yenohriquina yero saha wahahye. Wame yenohrina wahana Cristo yequina mari ijiyere ihñona niaja. Sa tiquina aco sohãri mare wame yenohriquina yero saha wahaye, Moise yequina tiquina ijiyere ihñone niahye. ³Sa ye tiquina ijipihitiyequina umuse cje ihyayere ihyae tiahye Cohãcjũ tiquiro ohoyere. ⁴Sa ihyaye tiquina ijipihitiyequina Cohãcjũ ohoari aco gũhure sihnie tiahye. Ti pjeure ti acore Cohãcjũ cãri utãpu wijiari acore sihnie tiahye tiquina. Tia utã yero saha ijiriquiro, tiquinare aco ohoriquiro Cristo ijiahye. ⁵Tiquina sa wahariquina ijiepegũta apequina tiquina mehna cjeña ñano yegũ ihñano Cohãcjũ pehe peyequina tiquina mehna bucuerahye. Sa yero tiquinare masa marienopũ yariagũ yeahye Cohãcjũ.

⁶Sata yeahye tiquinare Cohãcjũ marine buhero taro. Sa yero tiquinare ihña cã ñañene mari tutuaro cahmedatire Cohãcjũ sa yeahye tiquinare. ⁷Sa yena “Cohãcjũ ijire”, tiquina niñe queoyere tiquina ño peoriro saha yeracãhña msa. Ti queoyere tiquina ño peorire Cohãcjũ yere tiquina ojoari pũpũ yahuro ohõ saha niahye: “Tiquina ihya duji sihni tuhasa, wahcãdaca, bose deco ye dũcahye wecũ queoyere ño peoye tehe”, ni ojoahye panopũ. ⁸Came apequina Israe masa pehe numia mehna ñano yeahye. Tiquina yeriro saha yeraro cahmene marine. Tiquina ñano yeri bato ihcã decota tiquina veintitres mil masa yariaa wahahye. ⁹Apequina Israe masa Cohãcjũre tiquina mehna usuagũ yeahye. “Marine buhiri dahresi”, niñe Cohãcjũre tuhtiahye. Sa tuhtiyere tiquirore usuagũ yeahye. Tiquina sa yeri buhiri Cohãcjũ añaa pari mehna bahque wejẽahye tiquinare tja. Sa yena tiquina yero saha Cristore yeracãhña msa. ¹⁰Apequina Cohãcjũre unure tuhtigũ angel masare wejẽdiquiro tiquinare wejẽahye. Sa yena tiquina yero saha yeracãhña.

¹¹Sa wejẽ dutiahye tiquinare Cohãcjũ marine buhero taro. Mari pehe pihtiri deco panogã ijina ijiaja. Mari sa ijina ijigũ panopũ cjeña tiquina sa waharire Cohãcjũ oja dutiahye marine quehnoano buhero taro. ¹²Sa yena “Quehnoano ijiaja, Cohãcjũ tiquiro ihñagũ”, ni tuhotu, quehnoano yeya msa “Ñañene yeari”, nina. ¹³Mari ijipihitiya ihcãquiro dũsaro marieno ihquẽ tahari ñañene wacũaja. Sa wacũna ti ñañene ye duaja. Mari sa ye duepegũta Cohãcjũ marine yedohoducuriquiro ijire. Sa yero ti ñañe wacũñene mari bo masiedagũ tiquiro pehe marine yedohorota. Sa yero ti ñañene mari ye duagũ ihñano Cohãcjũ ti ñañene marine ye dueragũ yerota. Tiquiro sa yegũ ti ñañene ye duasi mari.

¹⁴Sa yena yũhũ cahña yũhũre tuhoya. “Cohãcjũ ijire”, tiquina niñe queoyere ne ño peoracãhña. ¹⁵Msa quehnoano masina ijigũ msare yahuaja. Sa yena yũhũ niato poto ijigũ masiña msa basi. ¹⁶Cristore tiquina ñehedi ñamine vinore tiquiro sihniato pano Cohãcjũre “Quehnoare”, niahye. Tiquiro nidiro saha mari gũhũ ti vinore sihnina Cohãcjũre “Quehnoare”, nina, mari ye buhiri Cristo tiquiro yariarire masigũ yena niaja. Tiquiro dii wijiari masigũ yena niaja. Sa yena tiquiro yequina mari ijie gũhũre masigũ yena niaja mari. Sa yena pãre mari Cristo yequina nuhana mari ye ijiatire tiquiro pagũ curusapũ tiquiro yariarire

masigũ yena niaja. Sa yena tiquiro yequina mari ijiye tiye gũhũre masigũ yena niaja. ¹⁷Sa yena peyequina masa ijiepenata ihcãria pãgãre ihyana, ijiphtina mari Cristo yequina ihcã curuata ijiaja. Sa yena peyequina ijiepenata ihcã curuata ijiaja.

¹⁸Israe masa tiquina yerire wacũña m̄sa: Tiquina wahiquirore wejẽñe, ẽjũa m̄o, ohoye, Cohãcjũre ño peore. Sa tiquina ohori bato ihcã curuata tiquina ohoriquirore ihyare. Sa ihyaye Cohãcjũ yequina tiquina ijiye tiyere masigũ yere tiquina. ¹⁹Ohõ sahata nii niaja m̄sare: “Cohãcjũ ijire”, tiquina niñe queoye dũhseati ijierare. Sa yero queoyere ño peo tiquina duhu peoye ihyaye pehe ihyo warota ijiro nine. Ti ihyaye marine sijoro saha wahagũ yerare. ²⁰Ti ihyaye sijoro saha wahagũ yerapegũta ti ihyayere ihyeraro cahmene. Ohõ saha ijire ti. Cohãcjũre cahmeñequina wahiquirore wejẽ, ẽjũa m̄o, Cohãcjũre ño peoye niedare. Sa ye queoyere ño peoye watia pehere ño peore tiquina. Tiquina sa ño peoyequina ijigũ tiquina mehna ihyana watino yequina yero saha yena niaga m̄sa. M̄sa sa yegũ pũritare ne cahmedaja. ²¹Santa cenare mari yeri deco mari pũhtoro Jesure wacũna tana sihniaja. Mari sa sihnina, watino ye pehere sihni masiedaja mari. Sa yena Jesure wacũna tana pãre ihyaja. Mari sa ihyana, watia ye pehere ihya masiedaja mari. ²²¿Jesure m̄sa mehna usuagũ ye duajari m̄sa? ¿Tiquiro yũhdũoro tutuana ijiajari m̄sa? Ijierare m̄sa. Sa yena quehnoano yeya m̄sa.

Cohãcjũ cahmeñe dihitare yeya

²³M̄sa yeri ñañe ijierapegũta tire yena apequinare yedohoeraboaga m̄sa. Sa yena tire yena Jesure wacũ tutua nemogũ yeraboaga m̄sa apequinare. ²⁴M̄sa cahmeñe dihitare yeracãhña. Apequina pehere quehnoano yedohoya m̄sa.

²⁵⁻²⁶Ihyaye duaropũre ihyayere dũna “¿Ahri ihyaye cohãmana queoye cahapũ tiquina duhu peori ihyaye ijiajari?” ni, sinitueracãhña. “Ñañene yeari”, nina, sinituboaga m̄sa. Sa ni sinitueracãhña. Ahri yehpa, ahri yehpapũ ijiye gũhũ Cohãcjũ ye ijire. Sa yena ti ihyayere “¿Ñañe ihyaye ijiajari?” niedacãhña.

²⁷Jesure cahmeediquiro m̄sare ihya dutiro tiquiro pijiogũ waha duana wahaya. Sa wahana m̄sare tiquiro duhu peoyere ihyaya. “¿Ahri ihyaye Cohãcjũ queoye cahapũ tiquina duhu peori ihyaye ijiajari?” ni, sinitueracãhña. ²⁸Sa yena apequiro Jesu yaquiro “Ahri ihyaye Cohãcjũ queoyere tiquina duhu peori ihyaye ijire”, m̄sare tiquiro ni yahugũ ti ihyaye pũritare ihyeracãhña. M̄sare sa ni yahuriquiro “Ñañe ihyayere ihyare ahriquina”, m̄sare tiquiro ni tũhotueratire ihyeracãhña. ²⁹Sa ihya dutieragũ m̄sa pehere yedohogũ tagũ sa niedũ. M̄sare ahrire yahuriquiro pehere yedohogũ tagũ sa ihya dutieraja. Tiquiro pehe m̄sare “Ñañe ihyayere ihyare ahriquina”, niboaga. “Sa niari”, nina ti ihyayere ihyeracãhña.

“Ihyeracãhña”, yũhũ nigũ ohõ saha ni sinitu yũhtiboaga m̄sa yũhũre: “¿Dũhse ijiro boro apequirore ‘Sijoro saha wacũari’ ”, nina ihyeraboagari usã? ³⁰“¿Ti queoyere ohori ihyayere usã ihyagũ Cohãcjũ warore ‘Quehnoare’, usã niepegũta dũhsero tire usã ihyari buhiri apequiro usãre yahu wajaboagari?”

ni sinitu yuhtiboaga masa yuhure. ³¹Ahri ijipihiyere yahugũ ohõ saha nigũ niaja musare: Decoripe Cohãcjũ tiquiro dutiriro sahata bucueye mehna ihya, sihniaja, Cohãcjũre masa tiquina ño peotire. Sa yena ijipihiyere quehnoano yeducuya Cohãcjũre masa tiquina ño peotire. ³²Ne judio masare, judio masa ijieyequinare, Cohãcjũ yequina gũhure ñano yegũ yeracãhña masa tiquinare. ³³Ohõ saha yeaja yuhũ pehe. Masa ijipihiyequinare yedoho duaja. Sa yegu yee ijiasi pehere pajiro tuhotueraja. Yuhũ ñano yuhdũgũ quehnoanota. Masa pehere yedohoaja tiquinare pecarũ wahaboriquinare Cohãcjũ tiquiro yuhduotire.

11 ¹Sa yena Cristore yuhũ ihña cũriro sahata masa gũhũ yuhure ihña cũña.

Corinto cãena cahmecoanopũ numia tiquina yeatire yahuahye

²Musare yuhũ buhe turirire wacũ pehoñhti masa. Sa wacũna musare yuhũ nidire yuhũ ye dutiriro saha yeñhti masa. Sa yena quehnoano yere masa. ³Sa yena masa ijiepegũta ahri gũhure masa masigũ cahmeaja: Ijipihiyequina umua tiquina puhtoro, Cristo ijire. Sa yero tiquiro namono puhtoro ijire ticoro manũno. Sa yero Cristo puhtoro tiquiro Pacuro ijire. ⁴Cohãcjũre sinidiquiro tiquiro dapure mohariquiro sinino, tiquiro basi puhtoro ijiyere wijiario nine. Cohãcjũ yere yahuriquiro gũhũ tiquiro dapure mohano, sata yero nine tiquiro gũhũ. ⁵Sa yero ticoro dapure moheno Cohãcjũre sinino, ticoro manũno puhtoro ijiyere wijiagũ yero nine. Cohãcjũ yere yahuricoro gũhũ ticoro dapure moheno, sata yero nine ticoro gũhũ. Sa yero ticoro poarire wuhari pji mehna wuhã pehoricoro yero saha yere ticoro. ⁶Ticoro dapure moha dueraro ticoro poarire se peho cã dutiahro. Ticoro sa yeri bato ticoro dapure bæe tiro, ticoro mohaahdo ticoro dapure. ⁷Umua pehe Cohãcjũ yero saha puhtoa ijire. Sa ye Cohãcjũ quehnoariquiro, tutuariquiro tiquiro ijie tyere ihñore tiquina pehe. Sa ye tiquina dapure moheñequinata ijiahro. Numia pehe umua tiquina puhtoa ijie tyere ihñore. Sa yeye tiquina dapure mohaahdo. ⁸Cohãcjũ umunore yero, numino ya pagũ cã mehna umunore yerahye. Numino pehere yero, umuno ya pagũ cã mehna yeahye ticorore. ⁹Sa yero umunore yero, numino yaquiro ijiatiquirore yerahye. Numino pehere yero umuno yacoro ijaticorore yeahye Cohãcjũ ticorore. ¹⁰Sa ye numia tiquina dapure mohaahdo angele gũhũ tiquina ihña bucueatire. Sa mohañe umua tiquina puhtoa tiquina ijiyere ihñõñe nine. ¹¹⁻¹²Cohãcjũ numinore yero, umuno pagũ cã mehna yeahye. Sata yojopũre umuno masa bajuaro, numino pagũrũ masa bajuare. Sa yero ijipihiyequinare Cohãcjũ pehe yeahye. Sa yero umuno tiquiro iji mũhtaedagũ numino mariedaboaga. Sa ye numino ticoro mariedagũ umuno gũhũ mariedaboaga. Sa ye tiquina umua numia gũhũ tiquina basi cahme yedohore masa putiatire. Sa yero ijipihiyequinare ijiatiquinare bajumehnediquiro ijire Cohãcjũ.

¹³¿Musa basi dũhse ni tuhutuajari? ¿Numino ticoro dapu mohedico, Cohãcjũre ticoro sinigũ quehnoajari, masa tuhutugũ? Ne quehnoaedare.

¹⁴Sa yero umuno poa nahmo cõricoro tiquiro ijigũ ñarĩne. Ijipihiyequina masa tire masine. ¹⁵Sa yero numino ticoro poa nahmo ticoro dapure mohari cahsero yero saha ijire. Sa yero ticoro poa nahmo cõricoro ijiro

quehnoaricoro bajure ticoro. Ti gũhure ijipihtiequina masine. ¹⁶Musa mehna cĵino ahrire yũhũ yahurire tiquiro cahmedagũ, ohõ saha ni yahutja tiquirore: “Yũhũ ni yahuriro saha yeducuaja mari. Apequina Jesu yequina gũhũ sata yere tiquina gũhũ. Usã sa yerina ijigũ ihñagũ yũhũ ni yahuriro saha yero cahmene mũhũ gũhure”, ni yahutja yũhũ yahurire cahmeediquirore.

Santa cenare tiquina ihyari watoa dojomehneahye Corinto cĵena

¹⁷Yojoꝛũre mũsare ahrire yahugũ tũũ, “Quehnoano yena ijire”, niedaja yũhũ mũsare. Musa cahmecoana quehnoano yerare. Ñano yere musa. ¹⁸Ohõ saha ni yahu mũhtautja mũsare: Musa cahmecoanopũ cahme dũse tutuana musa basi ihquẽ cururi tu wana niñohti musa. Apequina tire yũhũre tiquina yahugũ “Potota ijiaga”, ni tũhotuaja yũhũ. ¹⁹Sata yere musa. Sa yena ohõ saha ni tũhotumene musa. “Mari tu warina ijina, Jesu yequina waro ijiequina pehere masinata mari. Sa yena marine tu waro cahmene”, ni tũhotumene musa. ²⁰Musa basi sa cahme ihña tuhtina, musa ihcãnopũ cahmecoa ihyana quehnoano yerare. Potota Santa cena waro yena niedare. ²¹Musa cahmecoana ihquẽquina musa sehsharo ihya mũhtana, apequina pehere ĩjũa ahbagũ yere. Sa ye sihni mũhtana quehea wahare. ²²¿Mũsare musa ihyaye wũhuse mariedajari? ¿Mũsare musa sihniñe wũhuse mariedajari? Ti wũhusepũta ihya, sihniña. Yojoꝛũre Cohãcĵũ yequina tiquina cahmecoanore dojomehnena niaga musa. Sa yena apequina Jesu yequina pejescũoyequinare ihyaye marieñequina pehere musa pehe bũoro yũhdũgũ yere. ¿Dũhse ni yahugutari yũhũ mũsare? “Quehnoano yerare musa”, ni aja yũhũ.

Santa cenare ihyarire yahuahye Pablo

(Mt 26.26-29; Mr 14.22-25; Lc 22.14-20)

²³Mari pũthoro Jesu tiquiro ihya bato tirire yahuri yũhũre. Sa tiquiro yahuri bato yũhũ pehe mũsare tire yahuu. Ti ohõ saha ijire: Tiquirore ihña tuhtiequinare Juda tiquiro ihñoati ñamine mari pũthoro Jesucristo pãre ne, ²⁴Cohãcĵũre “Quehnoare”, niñohti. Tiquiro sa nidi bato ti pãre nuha, tiquiro buheyequinare itiñohti. Sa itiro ohõ saha niñohti: “Ahrire ihyaya. Ahri yũhũ pagũ ijire. Musa ye ijiatire yariutja. Yũhũre musa wacũatire ahrire ihyaya”, niñohti Jesu mari pũthoro. ²⁵Sa tiquina ihyari bato tiquiro sihnidi pare neno ohõ saha niñohti: “Musa ñañe yeyere cohãgũ tagũ yariutja. Sa yegũ ye diire cohãgũtja. Cohãcĵũ ‘Mũsare yũhdũoutja’ tiquiro nidiro esagũ yũhũ yariaro mehna tiquiro nidiro sahata sohtori tirota. Ahri papũ pose tiyere sihnina, yũhũ dii wijiarire wacũnata. Ahrire sihnina, yũhũre musa wacũatire sihniña”, niñohti Jesu. ²⁶Sa yena Santa cena cĵe pãre musa ihyana, sihniñene sihnina, Jesu mari pũthoro mari ye buhirire tiquiro yariarire wacũ, ihñona nine musa. Sa ihñoducunata musa tee ahri yehpapũ tiquiro tojoa tato pano.

“Santa cenare ihya sihnina ohō saha yeya”, ni yahuahye Pablo

²⁷Santa cenare ihya, sihnina, Jesure ño peoro marieno cua pesaro yerana, tiquiro pagure tiquiro dii cohāri gūhure bujupero saha yena niaja mari. Sa yena Jesure bujupena niaja mari. Sa yeyequina buhiri tiyequina ijire. ²⁸Sa yena mari yerire, mari ijiye tiyere quehnoano wacūhna. Sa wacūna Santa cenare ihya, sihni masiaja mari. ²⁹Mari puhtoro mari ye jjiatire tiquiro pagu yariarire wacūno marieno Santa cenare ihya, sihnina mari buhiri tinata. ³⁰Ohō saha dihita yere peyequina mūsa mehna cĵēna. Sa ye tiquina ihquēquina tutueyequina, dohatiyequina wahare. Sa ye apequina tiquina sa yeri buhiri yariaa wahare. ³¹Sa ijipegūta tiquina ihya, sihniñe tiquina yerire, tiquina ijiye tiyere quehnoano wacūne, tiquina ñañe yerire duhu, ti buhirire buhiri tieraboaga. ³²Mari puhtoro pehe marine tuhtire, tiquina ye buhirire marine buhiri ti dutieraro. Apequina ñañequina Jesure ño peoyequina buhiri tiatiquina dihita ijire. Tiquina yero saha marine buhiri tigū cahmedare mari puhtoro.

³³Sa yena yūhu acaye, Santa cenare ihyana tana cahmecoana, mūsa basi cohteniña. ³⁴Sa ye mūsa mehna cĵēna ũja ahba, tiquina ye wūhusepū ihyarīahdo. Sa yena Santa cenare ihyana tana cahmecoana, cua pesaro yerariquina ye buhiri buhiri tisi mūsa. Apee borore yahu duami mū sare. Came yūhu basi esagupū mū sare yahutja tire.

Cohācĵū yere mari yeatire cūno marine ye masigū yere Espíritu Santo

12 ¹Yūhu acaye ahrire yahu duaja mū sare. Cohācĵū yere mari yeatire cūno marine ijipiltinare ye masigū yere Espíritu Santo. Sa yegu tire mūsa quehnoano masigū cahmeaja.

²Jesu yequina ijieranina sijoro saha ijiye buheyere tuho nūnūna ijina, mūsa pehe “Cohācĵū ijire”, tiquina niñe queoyere, yahuducueye queoyere ño peomedi. Tire masine mūsa. ³Sa ijimedina mūsa ijigū yojopare ohō saha ni yahutja mū sare. “Jesu ñano wahacūnahdo”, niñequina Cohācĵū yaquiro Espíritu Santo tutuaye mehna sa niñe niedare. Espíritu Santo warore cūoerare tiquina. Sa ijiye “Jesu mari puhtoro ijire”, niñequina pehe Espíritu Santo tutuaye mehna sa niñequina ijire tiquina.

⁴Cohācĵū yere ye masiñe peye ijire. Ti sa ijipegūta marine ye masigū yeriquiro pehe ihcāquirola ijire. Tiquiro Espíritu Santo ijire. ⁵Sa ye apequinare yedohoye gūhu peye ijire. Ti sa ijipegūta mari puhtoro Jesu pehe marine yedoho dutiriquiro ihcāquirola ijire. ⁶Sa ye Cohācĵū yere yeye gūhu peye ijire. Ti sa ijipegūta Cohācĵū ijipiltina marine ye masigū yeriquiro pehe ihcāquirola ijire. ⁷Marine Jesu yequinare Espíritu Santo yedohoro, Cohācĵū tutuayere ihñono nine. Ohō sahata yedohore tiquiro Jesu yequinare ijipiltiyequinare mari quehnoano yeatire. ⁸Ihquēquinare quehnoano masi yahugū yere Espíritu Santo. Sa yero apequinare Cohācĵū yere quehnoano buhegū yere tiquiro. ⁹Sa yero apequinare Cohācĵūre quehnoano wacū tutuagū yere tiquiro. Sa yero apequinare Cohācĵū tutuayere ohore tiquiro. Ti tutuaye mehna tiquina pehe dohatiyequinare

yuhdugũ yere. Cristore tiquina wacũ tutuagũ ihñano tiquiore tiquina sinidiro sahata yere tiquiro. Espiritu Santo ihcãquiota ijiriquiro ti tutuayere ohore. ¹⁰Sa yero apequinare Cohãcjũ tutuaye mehna ihñoñene ye masigũ yere tiquiro. Sa yero apequinare Cohãcjũ yere quehnoano yahu masigũ yere tiquiro tiquinare. Sa yero apequina Jesu yequinare buheyere quehnoano bese masigũ yere tiquiro. Sa masiñe watĩno ye buheye ti ijigũ masine tiquina. Espiritu Santo waro ye buheye gũhũre ti ijigũ masine tiquina. Sa yero apequinare tũhomehneñe yahuducuyere yahuducu masigũ yere tiquiro. Sa yero tũhomehneñe yahuducuyere yahuducuyequina tiquina nino sahata yahu yuhduo masigũ yere tiquiro apequinare. ¹¹Espiritu Santo ihcãquiota ijiriquiro tiquiro cahmeno saha marine ijipiltinare yũhũ yahuriro saha ye masigũ yere. Ihquẽquinare sijoro saha ye masigũ yere. Apequina gũhũre sijoro saha ye masigũ yere.

Cristo yequina ijina ihcã curuata ijiaja mari

¹²Ohõ sahata ijire ahri mehna mari queoye mehna yahugũ: Mari pagũ ihcã pagũ ijiepegũta omocari, caperi, dahpocãri, cahmo ti pũrita peye ijire mari pagũrũ ijie. Sata ijiaja mari Cristo yequina gũhũ. Cristo yequina tiquiro pagũ yero saha ihcã curuata ijiaja. ¹³Sa yena Cristo yequina ijina, tiquiro pagũ yero saha ihcã curuata ijiaja mari. Judio masa, judio masa ijiena, cahacjãna, cahacjãna ijiena peye cururi mari ijiepenata ihcãquiota ijiriquiro tiquiro pagũ yero saha ihcã curuata ijiaja mari. Espiritu Santo ihcãquiota ijiriquiro tiquiro tutuaye mehna wame yenohrina ijiaja mari ijipiltina. Sa yena ihcãquioreta Espiritu Santore cõoaja mari, Cristo ya curua cjãna ijina.

¹⁴Mari pagũ ihcã pagũ ijiepegũta omocari, caperi, dahpocãri, cahmo, ti mari pagũrũ ijie peye ijire. ¹⁵Mũhũ dahpocã yahuducuri dahpocã ijiro, ohõ saha niboaga mũhũre sijoro saha ni duaro: “Omoca ijieraja yũhũ. Sa yegũ pagũ cjã dahpocã ijieraja yũhũ”, niboaga. Mũhũ dahpocã sa nieperota pagũ cjã dahpocã ijirota nine. ¹⁶Mũhũ cahmono yahuducuri cahmono ijiro, ohõ saha niboaga mũhũre sijoro saha ni duaro: “Capea ijieraja yũhũ. Sa yegũ pagũ cjã cahmono ijieraja yũhũ”, niboaga. Mũhũ cahmono sa nieperota pagũ cjã cahmono ijirota nine. ¹⁷¿Mari pagũ capea dihita ijigũ dũhse tũhoboagari mari? Basioerare. ¿Sa yena mari pagũ cahmono dihita ijigũ dũhse wijĩboagari mari? Basioerare. ¹⁸Sa ijierare mari pagũ. Ohõ saha ijire. Mari pagũrũ ijiyere Cohãcjũ tiquiro cahmeno saha cũahye mari pagũre. ¹⁹¿Mari pagũrũ ijie mariedagũ dũhse wahaboagari mari pagũ? ¿Mari omocari dihita ijigũ dũhse wahaboagari mari pagũ? ²⁰Mari pagũ ohõ saha ijire: Ihcã pagũ ijiepegũta mari pagũrũ ijie peye ijire.

²¹“Mũhũ yedohogũ cahmedaja”, mũhũ capea ni masiedare mũhũ omocare. Sa yero mũhũ dapu mũhũ dahpocãrine “Mũsa yedohogũ cahmedaja”, ni masiedare. ²²Apeye mari pagũrũ ijiyere “Ihõ iji cjũñe ijire”, mari niñe pehere pototi cahmeaja mari apeye mari pagũrũ ijie yuhduoro. ²³Sa yena mari pagũrũ ijiyere “Ihõ ijie ijire”, mari ni tũhotuepenata tire mari pagũrũ ijie cahmeaja mari, mari quehnoano ijato saha. Sa yena apeye mari pagũrũ ijie mari bũe

tiyere suhti mehna n̄oaja mari. ²⁴Apeye mari pagur̄u ijyere n̄oedaja mari. Ti p̄iritare ih̄n̄ona, b̄ue tieraja. Oh̄o saha iji dutiahye Coh̄ācj̄u mari pagure. Mari ih̄n̄oēnene mari pagur̄u ijyere mari quehnoano ño peoye mehna c̄uoaja. Sata ye dutiahye Coh̄ācj̄u. ²⁵Sa ye mari pagur̄u ijyere ti basi cahme yedohore. ²⁶Sa ye mari caperi ñano yuhd̄uḡu apeye mari pagur̄u ijyere ḡūh̄u ñano yuhd̄ure. Sa ye mari caperi quehnoañe wahaḡu mari pagur̄u ijyere ḡūh̄u quehnoano t̄uhoture.

²⁷Sa yeḡu oh̄o saha niḡu n̄iaja m̄usare: M̄usa pehe Cristo paḡu yero saha ih̄c̄a curuata ijire. Sa yena ijipih̄tina m̄usa tiq̄iuro pagur̄u ijyere yero saha tiq̄iuro yequina ijire. ²⁸Sa yero Jesu yequinare mari yedohotire c̄uahye Coh̄ācj̄u marine. Oh̄o saha c̄uahye tiq̄iuro marine. Ih̄qūēquinare marine buhe dutiro Jesu c̄ū m̄uh̄tarinare c̄uahye tiq̄iuro. Apequinare tiq̄iuro yere yahu m̄uh̄tariquinare c̄uahye. Apequinare masare buheatiquinare, apequinare Coh̄ācj̄u tutuaye mehna yeatiquinare, apequinare dohatiyequinare yuhd̄uotiquinare, apequinare masare yedohotiquinare, apequinare masa p̄uh̄toa ijiatiquinare, apequinare t̄uh̄omehneñe yahuducuyere yahuducuatiquinare c̄uahye Coh̄ācj̄u marine. ²⁹Sa tiq̄iuro c̄ūḡu ijipih̄tina ih̄c̄ano saha tiq̄iuro c̄ūrina ijieraja mari. Apequina Coh̄ācj̄u buhe dutiro tiq̄iuro c̄ūriquina ijierare. Sa yena apequina Coh̄ācj̄u yere yahu m̄uh̄tarina ijieraja mari. Sa yena apequina masare buhena ijieraja mari. Sa yena apequina Coh̄ācj̄u tutuaye mehna yeatina ijieraja mari. ³⁰Sa ye apequina dohatiyequinare yuhd̄uotiquina ijierare. Sa yena apequina t̄uh̄omehneñe yahuducuyere yahuducuna ijieraja mari. Sa yena apequina t̄uh̄omehneñe yahuducuyere yahu yuhd̄uana ijieraja mari. Sa yero maripe mari yeatire c̄uahye tiq̄iuro. ³¹Sa yena Coh̄ācj̄u yere ye masi duana quehnoa yuhd̄aye pehere tutuaro cahmeña m̄usa. Sa yeḡu ijipih̄tiye yuh̄u nidi yuhd̄uro m̄usa cahmeatire yojorp̄are yahutja m̄usare yuh̄u.

Apequinare quehnoano tiquina cah̄iatire yahuahye Pablo

13 ¹Masa ye yahuducuyere yahuducu masiepenata, angele ye yahuducuyere yahuducu masiepenata apequinare cah̄iedana, d̄uh̄seanaja ijieraja mari. Sa ye mari yahuducuye ḡūh̄u d̄uh̄seati ijierare. Sa yena apequinare cah̄iedana mari yahuducuna, ih̄yo waro yahuducuna n̄iaja. ²Coh̄ācj̄u yere quehnoano yahu masiepenata, masa tiquina masiedarire Coh̄ācj̄u yere tiquina buheri ḡūh̄ure masi pehoepenata apequinare cah̄iedana d̄uh̄seanaja ijieraja mari. “Ahd̄u c̄un̄u ape siep̄u wahaahro”, mari niḡu “Potota mari nidiro sahata Coh̄ācj̄u yerota”, ni mari t̄uh̄otuḡu sata yerota. Coh̄ācj̄ure sa ni t̄uh̄otuyequina ijiepenata apequinare cah̄iedana ne d̄uh̄seanaja ijieraja mari. ³Ijipih̄tiyere pejec̄uoyequinare mari ohoep̄eḡūta apequinare mari cah̄iedaḡu ti mari ohori d̄uh̄seati ijierare. Sa yena Coh̄ācj̄u yere yena tana mari pagure mari ʄj̄ūa m̄uo dutiepeḡūta apequinare mari cah̄iedaḡu ti mari sa yeye d̄uh̄seati ijierare.

⁴Usueraja apequinare cah̄ina. Tiquinare cah̄ina quehnoano yeaja tiquinare. Sa yena apequinare cah̄ina tiquinare coeraja. Sa yena mari cah̄iniquiro mehna ijina “M̄uh̄u yuhd̄uro ijiḡu ijiaja”, niedaja mari. ⁵Apequinare cah̄ina

“Musa masi yuhducujaja”, niedaja mari tiquinare. Sa yena apequinare cahina tiquinare ño peoro mehna yeaja mari. Apequinare cahina “Usa cahmeno saha yeaja. Musa cahmeno saha yeraja”, niedaja mari. Sa yena tiquinare cahina duita usueraja mari tiquina mehna. Sa yena apequinare cahina marine ñano tiquina yegũ gũhure tiquina mehna sa usuaducueraja mari. ⁶Apequinare cahina ñañene tiquina yegũ ihñana bucueraja mari. Quehnoañe pehere tiquina yegũ ihñana tutuaro bucueaja. ⁷Apequinare cahina tiquina ye buhiri ñano yuhdæpenata tiquinare sa cahiducujaja mari. Apequinare cahina apequina pehe mari cahinequinare tiquina yahu wajagũ tuhopenata tire tuho dueraja. Mari cahinequinare apequina yahugũ quehnoañe dihitare tuho duaja mari. Apequinare cahina “Tiquina ñañene yesi”, ni tuhotuaja mari tiquinare. Apequinare cahina ñano yuhdæpenata tiquinare cahĩ duhusi mari.

⁸Ti cahme cahine ne pihtisi. Cohãcjũ yere yahuye pehe came pihtia wahaota. Tuhomehneñe yahuducuye gũhũ came pihtia wahaota. Cohãcjũ yere masa tiquina buheri gũhũ came pihtia wahaota. Apequinare cahme cahine pehe ne pihtisi. ⁹Yojopũre Cohãcjũ yere mari masi peho masiedaja. Sa yena tiquiore yere yahuna mari yahu peho masiedaja. Mari masi pehoati duhsare. ¹⁰Sa yena Cristo ñañe marieniquiuro tiquiore tojoa wihiri bato mari masi pehonata. Sa yena ñañe mariena ijinata. Ti pjere masi pehonata. “Masiedaja”, ni nemosi.

¹¹Mari masi pehoati ohõ saha ijire: Nijigũ ijigũ nijinogã yero saha yahuducumi yuhũ. Sa yegũ nijinogã yero saha tuhotumi. Sa yegũ bucũ wahagũ nijinogã tiquiore yeriro saha duhu cãũ. Sata mari yojopũre “Masi pehoeraja”, niepenata camepũre masi pehonata. ¹²Eõno quehnoano wuhdoa bajuero saha yojopũre quehnoano masi pehoeraniaja mari. Came apequiore quehnoano mari ihña masino saha mari masi pehonata. Yojopũre mari masi pehoati marine duhsare. Cohãcjũ marine tiquiore quehnoano masi pehoriro saha came mari gũhũ quehnoano masi pehonata. ¹³Sa ye ihtiarore mari ye masiaja yojopũre. Cohãcjũre wacũ tutua masiaja. Sa yena marine tiquiore yuhduoatire masina, mari quehnoano cohte masiaja. Sa yena apequinare cahme cahĩ masiaja. Ahri ihtiaro ijire pototi mari yeati. Sa yena apequinare cahme cahina, ahri pũaro yuhduoro yena niaja. Wacũ tutuaye, tiquiore yuhduoatire cohteyẽ yuhduoro ijire cahme cahine pehe.

Tuhomehneñe yahuducuyere yahuahye Pablo

14 ¹Sa yena apequinare cahme cahina musa. Sa ye Cohãcjũ yere musa quehnoano ye masiatire cahmeña musa. Cohãcjũ yere musa yahuati pũritare tutuaro cahmeña musa. ²Tuhomehneñe yahuducuyere yahuducuriquiore Cohãcjũ mehna dihita yahuducure. Sa ni yahuducuro masa mehna yahuducuro niedare tiquiore. Tiquiore sa ni yahuducugũ tuhoye masa pehe ne tuhoreare tiquiore. Masa tiquina masiedarire Espiritu Santo tutuaye mehna yahuducuro nine tiquiore. ³Cohãcjũ yere yahuriquiore pehe masa pehere yahure. Sa yahuro tiquiore masare yedohoro nine. Sa yero tiquinare buhero nine tiquiore. Sa yero tiquina ñano yuhdugũ tiquinare bucuegũ yere. ⁴Tuhomehneñe yahuducuyere

yahuducuriquiuro ihcãquiurota buhere. Apequinare buherare. Cohãcjũ yere yahuriquiuro pehe apequinare Jesu yequinare buhero, yedohore tiquiuro.

⁵Tũhomehneñe yahuducuyere ijipitina mũa yahuducugũ quehnoaboaga, yũhũ tũhotugũ. Sa ijiepegũta Cohãcjũ yere mũa yahugũ pũritare tutuaro cahmeaja. Cohãcjũ yere yahuriquiuro pehe tũhomehneñe yahuducuyere yahuducuriquiuro yũhdũoro apequinare yedohore. Sa ijiepegũta tũhomehneñene yahuducuriquiuro tiquiuro yahuducuyere apequiuro yahu yũhdũogũ tiquina pehe pototi apequinare yedohore. Tiquiuro yahuducuyere yahu yũhdũoriquiuro ijiro tiquiuro pehe apequinare Jesu yequinare buhero nine. ⁶Tũhomehneñe yahuducuyere mũa mehna yũhũ yahuducugũ, apequiuro mũsare tiquiuro yahu yũhdũoeragũ mũsare yedohoeraboaga yũhũ. Sa yegũ Cohãcjũ yũhũre tiquiuro yahurire yahugũ, tiquiuro yere yũhũ masiñene yahugũ, apeyere tiquiuro yere yahugũ mũsare yedohogũ niaja. Tire mũa tũhoatire mũsare buhegũ mũsare quehnoano yedohogũ niaja yũhũ.

⁷Tũhomehneñene yahuducuriquiuro tiquiuro yahuducuye basa wamo a yero saha ijire. Carisure putina, arpare bũa pũtẽna tire mari queoro yeragũ ti basayere apequinare masino basioerare. ⁸Sa yero cornetare putiriquiuro surara ijiro tiquina cahme wejẽato panore queoro tiquiuro putieragũ apequina surara pehe tiquina cahme wejẽatire masisi. Sa ye tiquina cahme wejẽato pano tiquina wejẽatire wamoare quehnoyuriquina ijisi tiquina. ⁹Sata mũa gũhu tũhomehneñe yahuducuyere mũa yahuducugũ tũhoye, yahu yũhdũoriquiuro mariedagũ apequina tire ne masisi. Tiquina sa masiedagũ mũa yahuducuye dũhseati ijierare. ¹⁰Ahri yehpapũ peye yahuducuye ijiaja. Sa ye tire yahuducuyequina tiquina basi sa yahuducuyere quehnoano tũhore. ¹¹Ihcãquiuro ye yahuducuyere yũhũ tũhoeragũ ihñano tire yahuducuriquiuro pehe “Ape dihta cjũno ijire”, ni tũhoturota yũhũre. Sa yegũ yũhũ gũhũ sata ni tũhotutja tiquiuro. ¹²Sata ijiri mũa gũhũ tũhomehneñene yahuducuna. Espĩritu Santo tiquiuro tutuaye mehna tutuaro ye duamene mũa. Tiquiuro tutuaye mehna sa ye duana apequina Jesu yequinare mũa buheatire tiquinare mũa yedohoatire tutuaro cahmeña mũa.

¹³Sa yero tũhomehneñene yahuducuriquiuro tiquiuro yahuducurire tiquiuro quehnoano yahu yũhdũoatire Cohãcjũre siniahdo tiquiuro.

¹⁴Tũhomehneñe yahuducuye mehna Cohãcjũre sinigu yũhũ tũhotuye mehna sinigu niaja. Sa sinigu yũhũ tũhotuyere apequinare quehnoano yahueraja. Sa yegũ apequinare yedohoeraja yũhũ.

¹⁵Ahrire masina, ohõ saha yenata mari: Espĩritu Santo tutuaye mehna tũhomehneñe yahuducuye mehna Cohãcjũre sininata. Sa yena ape deco pũ quehnoano masi tũhotu, apequina tiquina quehnoano tũhoatire tiquina ye mehna Cohãcjũre sinina, ti gũhũre sininata tja. Espĩritu Santo tutuaye mehna tũhomehneñe yahuducuye mehna Cohãcjũ yere basanata. Sa yena ape deco quehnoano masi tũhotu, apequina tiquina quehnoano tũhoatire tiquina ye mehna Cohãcjũ yere basana, ti gũhũre basanata tja.

¹⁶Mari sa yeragũ tũhomehneñe yahuducuye mehna Espiritu Santo tutuaye mehna Cohãcjũre “Quehnoariquiuro, tutuariquiuro ijire”, mari niepegũta apequina pehe ne tũhoerare. Sa tũhoeraye “Poto ijire”, ni masiedare. ¹⁷Tũhomehneñe yahuducuye mehna Cohãcjũre “Quehnoare”, ni masiaja mari. Mari sa niñe quehnoañe ijiepegũta tire yahu yũhdũoerana apequinare buheraja mari. Sa yena tiquinare yedohoeraja mari. ¹⁸Ijipihtina mũsa yũhdũoro yũhũ pehe tũhomehneñene yahuducuaaja. Sa yegũ Cohãcjũ yũhũre sa yahuducu masigũ tiquiro yegũ tiquirore “Quehnoare”, niaja yũhũ. ¹⁹Sa yahuducugũ yũhũ ijiepegũta Jesu yequina cahmecoañequina watoa yũhũ ijigũ, tũhomehneñe yahuducuye mehna peye yũhũ yahuepegũta dũhseati ijierare. Ti yũhdũoro masa tiquina quehnoano tũhoati pehe meheñegã yũhũ yahuepegũta quehnoarĩne, yũhũ tũhotugũ.

²⁰Yũhũ acaye, macanagã tũho masieñequinagã tiquina ijiro saha ijieracãhña mũsa. Sa yena coã bajuayequina ñañe yeyere tiquina masieno saha ijiya mũsa gũhũ. Sa yena bucũna tũho masieñequina tiquina ijiro saha ijiya mũsa. ²¹Cohãcjũ yere tiquina ojoari pũpũ ohõ saha nine: “Tũhomehneñene yahuducuyequinare ahriquina masare yeere yahu dũtiitja. Sa yegũ ape dihta cjẽnare yeere yahu dũtiitja ahriquina masare. Yũhũ sa yahu dũtiepegũta ahriquina yũhũ yahuyere tũhosi’, nine Cohãcjũ mari pũhtoro”, nine Cohãcjũ yere tiquina ojoari pũpũ. ²²Sa ye tũhomehneñene yahuducuye Jesu yequinare Cohãcjũ tutuayere masigũ yeati ijierare. Ti yahuducuye Jesure cahmeeñequina pehere Cohãcjũ tutuayere masigũ yeati ijire. Sa yero Cohãcjũ yere yahuye Jesure cahmeeñequinare Cohãcjũ tutuayere masigũ yeati ijierare. Cohãcjũ yere yahuye Jesu yequina pehere Cohãcjũ tutuayere masigũ yeati ijire.

²³Sa ye ijipihtina mũsa Jesu yequina cahmecoagũ tũhomehneñene mũsa yahuducugũ tire masieñequina, apequina Jesure cahmeeñequina gũhũ sajã, tũhoboaga. Sa tũhoye “Tiquina tũho masieñequina ijire”, niboaga mũsare tiquina. ²⁴Ijipihtina mũsa Cohãcjũ yere mũsa yahugũ pũrita tire masiedariquiuro, Jesure cahmedariquiuro sajã dũca tũhoro, tiquiro ñañe yerire masiboaga tiquiro. Sa yero tiquiro ñañe yerire bũjũna witiboaga tiquiro. ²⁵Sa yero poto tiquiro ijiye tiyere tiquiro tũhotuye gũhũre masiboaga tiquiro. Sa yero Cohãcjũ poto dũsepe curi mehna quehe saro, tiquirore ño peorota. Sa yero “Cohãcjũ potota mũsa mehna ijire”, ninota tiquiro mũsare.

Mũsa cahmecoana quehnoano yeya dojomehneneno marieno

²⁶Sa yegũ yũhũ acaye, mũsare ahrire nigũ niaja: Cahmecoana ihquẽquina mũsa mehna cjẽna Cohãcjũ yere basa duare. Sa yena apequina buhe duare. Sa yena apequina Cohãcjũ mũsare tiquiro buherire yahu duare mũsa. Sa yena apequina tũhomehneñe mehna yahuducu duare mũsa. Sa yena mũsa apequina ti yahuducuyere yahu yũhdũo duare mũsa. Ti ijipihtiyere sa yena apequina mũsare tũhoyequina tiquina quehnoano masiatire tire yeya.

²⁷Sa yena tūhomehneñe mehna mūsa yahuducuna pūana, ihtiana topenata yahuducuya mūsa. Sa yena camesa yahuducuya. Mūsa sa yahuducugū, ihcāquiro mūsa mehna cĵūno mūsa yahuducurire apequinare yahu yūhduoahro. ²⁸Mūsa yahuducuyere yahu yūhduoriquiro mariedagū mūsa cahmecoana ijipihtina mūsa tūhomehneñene yahuducu duana yahuducueracāhña. Sa yena masa marienopū Cohācĵū mehna yahuducuya mūsa. ²⁹Sa yena Cohācĵū yere yahu duana pūana, ihtiana topenata yahuya mūsa. Mūsa sa yahugū apequina mūsare tūhoyequina mūsa yahurire quehnoano tūho nūnūahdo. ³⁰Sa yero Espiritu Santo Cohācĵū yere apequirore topū dujiriquirore yahu dūcaboaga. Tiquiro yahu dūcagū tiquirore tūhoriquiro gūhū Jesu yequinare yahu duaboaga. Sa yero tiquiro pano yahuriquiro pehe dihta mariahdo. ³¹Sa yena ijipihtina mūsa Cohācĵū yere yahuna, camesa yahuya mūsa ijipihtiyequina apequina tiquina quehnoano tūhoatire, tiquina quehnoano buceatire. ³²Sa yena Cohācĵū yere yahuna ijina, quehnoano tūho masi, quehnoano tūhotu yahuducuya.

³³Cohācĵū tiquiro yequina tiquina cahmecoanopū tiquina cahme yahuducugū, suhrigū cahmedare tiquiro. Dojomehnenno marieno tiquina quehnoano ijigū cahmene tiquiro. Ijipihtiropū Jesu yequina cahmeco, ohō saha yere tiquina. ³⁴Tiquina cahmecoanopū numiare yahuducu dutierare. Tiquina numiare mari pehe yahuducu dutieraja. Cohācĵū ojoari pūpū tiquiro nidiro sahata numiare ūmūare quehnoano yūhtiyequina numia ijiro cahmene. Sa ye cahmecoanopū numia masare yahuducueracāhdo. ³⁵Jesu yequina tiquina cahmecoanopū numia tiquina yahuducugū nārīne. Sa yero apee borore masi duaro numino ticoro ya wūhūpūta ticoro manūnore sinituahro.

³⁶Ahri yūhū yahuatire quehnoano masiña mūsa. Cohācĵū yere yahu mūhtana ijierare mūsa. Sa yena tiquiro yere tūhorina mūsa dihta ijierare. Apequina gūhū tiquiro ye buheyere cūore. ³⁷Mūsa mehna cĵūno “Yūhū Cohācĵū yere yahugū ijiaja”, ni tūhoturiquiro ijiro ahri mūsare yūhū ojoari Cohācĵū dutiye ijigū masiahdo tiquiro. Sa yero apequiro “Espiritu Santo tutuaye mehna ye masiaja”, ni tūhoturiquiro ijiro tiquiro gūhū ahri yūhū ojoari Cohācĵū dutiye ijigū masiahdo tiquiro. ³⁸Tire tiquiro masi dueragū yūhū ojoarire “Poto ijierare”, tiquiro nigū tiquirore duhu cāhña. Tūhoeracāhña tiquirore.

³⁹Sa yena yūhū acaye, Cohācĵū yere yahuna mūsa ijiatire tutuaro cahmeña mūsa. Sa yena mūsa mehna cĵēna mūsa cahmecoanopū tūhomehneñe yahuducuye mehna tiquina yahu duagū “Sa yahuducueracāhña”, niedacāhña tiquinare. ⁴⁰Sa cahmecoana quehnoano, cahme dojomehnenno marieno yeya mūsa.

Quehnoañe buheyere tiquiro yahurire yahuahye Pablo

15 ¹Yojopūre yūhū acaye, quehnoañe buheyere mūsare yūhū yahurire mūsare wacūgū ye duaja. Ti buheyere quehnoano cahmene mūsa. Sa cahmena ti buheyere ne cohāedare mūsa. ²Mūsa sa cahmegū tire mūsa

cohãedagũ Cristo musare pecapũ wahaborinare yũhdũo tuhasari. Mũsa sa tuhori bato Cristo yere mũsa duhu cãgũ ti mũsa tuhori dũhseati ijierare.

³Ohõ saha ni yahu muhtautja musare. Ahri ihyo waro ijierare. Musare buhegu yũhũre Cristo tiquiro yahurire musare ohõ saha ni yahuu: Cohãcjũ yere tiquina ojoariro sahata mari ñãñe buhirire Cristo yariahye. ⁴Sa yero Cohãcjũ yere tiquina ojoariro sahata Cristo tiquiro yariari bato apequina tiquirore tiquina yagũ ihtia deco wahaboro tiquiro pehe masa wijiahye. ⁵Tiquiro sa masa wijari bato Pedrore bajuahye. Tiquiro sa bajuari bato apequinare tiquiro buheyequinare bajuahye tja. ⁶Tiquiro sa bajuari bato ihcã tahata quinientos bui ijieyequinare tiquiro yequinare bajuahye tja. Ihquẽquina tiquirore ihñariquina mũna yojopũre yariariquina mũna ijire. Tiquina sa ijiepegũta peyequina tiquina mehna cjẽna yojopũre ijinine. ⁷Came Cristo Santiagore bajuahye tja. Sa tiquiro bajuari bato ijipihtiyequina buhe duti tiquiro cũriquinare bajuahye tja.

⁸Ijipihtiyequina apequinare tiquiro bajuari bato yũhũ gũhũre bajuari tja. Nijinogã queoro masa bajueriquirogã tiquiro masa bajua mũnũ tãriro saha yũhũ gũhũ Jesure wacũ tutua mũnũ tãrigũ ijiaja. Yũhũ sa ijirigũ ijigũ tiquina batopũ bajuari Jesu yũhũ gũhũre tja. Yũhũreta tiquiro bajua bato tiri. ⁹Panopũre Jesu yequinare ñano yemi. Sa yerigũ ijigũ apequina Jesu cũriquina ijipihtiyequina tiquina docapũ waro ijiaja yũhũ. Sa yegu yojopũ gũhũre Jesu buhe duti tiquiro cũnohborigũ ijierami yũhũ. ¹⁰Sa ijiepegũta Cohãcjũ yũhũre cahigũ yojopũre Jesu cũrigũ ijiaja yũhũ. Sa yegu yũhũre tiquiro cahigũ yojopũre tiquiro cahmeñene ye pehoaja. Sa yegu yũhũre cahigũ tiquiro yaquiro sa iji cãgũ niedaja. Ijipihtiyequina apequina tiquiro cũriquina yũhdũoro yũhũ pehe tutuaro buhei. Sa buhegu yũhũ esa tuhoro buherũ. Cohãcjũ yũhũre cahĩno yũhũre yedohori. ¹¹Usã buheye pehe ihyo waro ijierare. Yũhũ musare quehnoañe buheyere buherigũ yũhũ ijigũ apequina yũhdũoro yũhũre mũsa ño peogũ ihyo waro ijero nine. Tiquina gũhũ musare buheyequina ijigũ apequina yũhdũoro tiquina gũhũre mũsa ño peogũ ihyo waro ijero nine. Usã pehe ahrire buhena ijiepenata ihyo ijina ijiaja. Usã buheye pehe ihyo waro ijierare. Sa yena mũsa pehe ahri buheyere quehnoano tuhore.

Yariariquina mũna tiquina masa wijiarire yahuahye Pablo

¹²Cristo yariari bato tiquiro masa wijiarire usã buhepegũta “Yariariquina mũna ne masa wijiaerare”, nine mũsa mehna cjẽna ihquẽquina. ¿Dũhe ijero boro sa nijari tiquina tire? ¹³Sa yero yariariquina mũna masa wijiaeragũ Cristo gũhũ ne masa wijiaeraboya. ¹⁴Sa ye Cristo masa wijiaeragũ quehnoañe buheyere usã yahuri ne dũhseati ijieraboya. Tiquiro masa wijiaeragũ tiquirore mũsa wacũ tutuaye gũhũ dũhseati ijieraboya. ¹⁵Masa wijiaro mariedagũ usã pehe Cohãcjũ yere ni mehona niboya. Yariariquina mũna tiquina masa wijiaeragũ Cohãcjũ pehe Cristore masa wijiaeragũ yeraboya. Tiquiro sa yeragũ “Cohãcjũ Cristore masa wijiaeragũ yeahye”, nina ni mehona ijiboaga usã. ¹⁶Yariariquina mũnare Cohãcjũ masoedaro, Cristo gũhũre tiquiro masoedaboya. ¹⁷Sa yero Cristo masa wijiaeragũ tiquirore mũsa wacũ tutuaye dũhseati ijieraboaga. Sa yena mũsa ñãñe buhiri, buhiri tiboaga

musa. ¹⁸Masa wijiario mariedagũ Cristo yequina muna yaria muhtariquina pecapu waha tuhasaboya. ¹⁹Cristore mari wacũ tutuari bato mari yariana masa wija masiedana ijipihitiyequina apequina masa yũhdũoro pejecuona ijiboaga mari pehe. Sa yena tiquirere ihyo warota wacũ tutuana niboaga mari.

²⁰Potota Cohãcjũ Cristore masa wijiagũ yeahye. Cristo masa wijiario bato mari gũhu yarianapu masa wijanata ijaja. Tiquiro sa masa wijiario, marine siho masa wija muhtariquiro ijire. ²¹Ohõ saha ijire ahri: Adán mehna masa yaria dũcahye. Ohõ saha apequiro mehna yariariquina muna masa wijaeta. ²²Adán yequina iji nũnũ tãnapũ mari ijipihitina yarianata. Sata Cristo yequina mari ijigũ mari yariario bato marine masa wijiagũ yerota Cohãcjũ. ²³Ihquẽ cururi masare tiquina queori pje ijigũ masa wijaeta. Cristo marine iji muhtariquiro masa wija muhtahye. Came ahri yehpapũ tiquire tojoa tagũ tiquire yequina gũhu masa wijaeta. ²⁴Ti pjeta pihitiri deco ijirota. Sa yero ijipihitiyequina wafiare, wafia puhtoare, tutuayequinare cohãno, Cristo yũhdũdũcarota. Tiquiro sa yeri bato ijipihitiyequina puhtoro tiquire ijirire Cristo wijiario, Cohãcjũre mari Pacũre comesarota. ²⁵Tiquiro wijiato pano mari Pacũ Cristore ihña tuhtiyequinare tiquire yũhdũdũca pehoato pano Cristo pũrita ijipihitiyequina puhtoro ijirota. Sa ijiriquirota ijiro cahmene tiquire. ²⁶Tiquirore ihña tuhtiyequinare tiquire yũhdũdũcari bato, yariamedi gũhũre cohã cãnota. Yariaye pihitia wahaarota. ²⁷Ijipihitiyequina bui dutiatiquirore cũahye Cohãcjũ Cristore. Ijipihityere cũoriquiro gũhũre cũahye tiquire. Sata nine Cohãcjũ yere tiquina ojoari pũpũ. Cohãcjũ pehe tiquire cũriquiro ijire. Sa yero “Ijipihitiyequina bui dutiatiquirore cũahye tiquire”, nino, “Cohãcjũ bui dutiriquiro ijire tiquire”, nino niedahye tiquire yere tiquina ojoari pũpũ. ²⁸Ijipihitiyequina bui dutiriquiro Cristo Cohãcjũ macũno ijigũ Cohãcjũ tiquire cũriquiro pehe tiquire macũno bui dutiriquiro ijirota. Sa yero Cohãcjũ pehe ijipihitiyequina puhtoro waro ijire. Ijipihityere cũoriquiro gũhu ijire.

²⁹¿Masa wijiario mariedagũ dũhse ye apequina masa yariariquina muna ye ijiatire tiquina wame yenohriquina ijajari? Yariariquina muna masa wijaeragũ tiquina ye ijiatire apequina wame yegũ ihyo warota wame yenohriquina ijiboaya.

³⁰Usã pehe usã buheri buhiri decoripe apequina usãre tiquina ñano ye duagũ cuarĩne usã gũhũre. Usãre sa cuaepegũta masa wijiario ijigũ masina sa buheducujaja usã. ³¹Mari puhtoro Jesucristo yequina musa ijigũ tiquire wacũ tutua nemonã musa wahagũ yũhu pehe tutuaro bucueaja yũhu musa mehna. Ti ijirota ijire. Sa yero “Dũhse ijiri decopũ yũhũre yariario cuarĩne”, yũhu nigũ ti gũhu ijirota ijire. ³²Efeso cjẽna usuayequina quehnoañe buheyere yũhu buheri buhiri yũhũre quẽdi. Masa wijiario mariedagũ Jesu yaquiro yũhu ijieragũ, yũhu sa ñano yũhdũri dũhseati ijieraboya. Ihyo waro ñano yũhdũgũ niboaya yũhu. Yariariquina muna tiquina masa wijaeragũ ohõ saha niboaga mari: “Came cjũnogã yarianata. Dũhse wahasi mari. Sa yena ihyã sihniihna. Mari esa tuharo yeihna”, niboaga mari.

³³Ni mehoñene tuhotueracãhña musa. “Ñañequinare piti tina, quehnoañe musa yerire bonata musa”, nine masa. Ti ijirota ijire.

³⁴Quehnoañene tũhotuna ijiya mũsa. Sa yena quehnoañene yena ijiya tja. Sa yena ñañene ye nemoedacãhña tja. Ihquẽquina mũsa mehna cjẽna ne Cohãcjũre masiedare. Mũsa bũoro wahati pehere mũsare sa niaja.

Yariariquina mũna tiquina masa wijiare yahu nemoahye Pablo

³⁵Sa ye mũsa mehna cjũno ohõ saha ni sinituboaga yũhure: ¿Dũhse yariariquina mũna masa wijiare? ¿Dũhse ijiye pagũri masa wijiare? ni sinituboaga. ³⁶Sa sinituriquiũro tũho masieniquiũro ijire. Oteri pjere mari oteri bato ti pje ahbagũ waro pihnine. Ahbaeraro ne pihnisi. Tire masine mũsa. ³⁷Bũjũye cjũpũre oteraja mari. Ti pjeri dihitare oteaja mari. Ti pjeri trigo pjeri ijiro ijiuboaga. O apee boro pjeri ijiro ijiuboaga. ³⁸Ti pjerire mari oteri bato Cohãcjũ tiquiũro cahmediro saha ti pjerire bũcũa mũjagũ yere. Sa yero oteye pjerire bũjũye pihniũgũ yere tiquiũro. Sata pihni dutire Cohãcjũ.

³⁹Ijipihtiyequina pagũri ihcãno saha bajuerare. Masa pagũri pehe ihcãno saha ijire. Wahiquina pagũri gũhũ sijoro saha bajure. Minicjũa pagũri gũhũ sijoro saha bajure. Sa yeye wahi gũhũ sijoro saha pagũ tire. ⁴⁰Sa ye uhmũse cjẽ gũhũ sijoro saha bajure. Sa yeye ahri yehpa cjẽna gũhũ sijoro saha pagũ tire. Sa yeye uhmũse cjẽna pagũri gũhũ sijoro saha bajure. Sa yeye ahri yehpa cjẽ uhmũse cjẽ yero saha ijierare. ⁴¹Ohõ saha ijire. Asũ deco cjũno asi sitere. Sa ye ñami cjũno gũhũ sijoro saha ijire tiquiũro gũhũ. Ihyo buhriore. Sa yeye ñahpicoha gũhũ sijoro saha asi paare. Ñahpicoha pari gũhũre mari ihũagũ ihquẽ paca mehenogã asiye paca bajure. Sa yeye apeye paca tutuaro asiye paca bajure.

⁴²Ohõ saha ijire yariariquina mũna tiquina masa wijiagũ. Masũno tiquiũro pagũre mari yari bato tiquiũro pagũ ahbaa waharota. Sa yero ape pagũ sijoro saha ijiri pagũ ijipihtiye decori catiati pagũ masa wijiare. ⁴³Ti pagũre mari yagũ yariariquiũro mũnano pejecũo nine. Cohãcjũ tiquiũrore masogũ tiquiũro pagũ quehnoa yũhũari pagũ ijire. Sa yero tiquiũro pagũ mari yari pagũ tutuaye mariedi pagũ ijire. Sa yero Cohãcjũ tiquiũrore masogũ tiquiũro pagũ tutua yũhũare. ⁴⁴Ahri yehpa cjã pagũre mari yagũ yariariquiũro mũnano tiquiũro masa wijiagũ tiquiũro pagũ uhmũse cjã pagũ ijirota. Ahri yehpa cjã pagũre mari cũona, uhmũse cjã pagũ gũhũre cũonata, masa wijiãna.

⁴⁵Sata ni yahure Cohãcjũ yere tiquina ojoari pũpũ: “Ahri yehpapũ iji mũhtariquiũro Adãn wame tiriquiũro catiriquiũro wahahye”, ni ojoahye. Ti sa ijiepegũta Adãn yero saha ijiriquiũro bato tiriquiũro Cristo pehe catiyere ohoro ahtahye. ⁴⁶Ahri yehpa cjã pagũ iji mũhtari pagũ ijire. Camepũ uhmũse cjã pagũ ijirota. ⁴⁷Ohõ saha ijire: Iji mũhtariquiũro Adãn pehe ahri yehpa cjũno dihta mehna tiquiũro yeri pagũre pagũ tiahye. Tiquiũro bato ahtariquiũro, Cristo pehe uhmũsepũ ahtahye. ⁴⁸Dihta mehna tiquiũro yeri pagũre pagũ ti mũhtariquiũro tiquiũro ijiriro saha ijipihtina apequina dihta mehna tiquiũro yeri pagũre pagũ tina ijiãna mari. Sa yena uhmũsepũ ahtariquiũro yero saha tiquiũro yequina ijipihtina tiquiũro yero saha pagũ tina ijinata mari. ⁴⁹Dihta

mehna tiquiro yeri pagure pagu tiriquire yero saha bajuaja mari. Tiquiro yero saha mari ijiriro saha umuse cjuño yero saha bajunata mari.

⁵⁰Yuhu acaye, musare ahrire yahu duaja: Ahri yehpa cja pagu dii mehna, dihi mehna ijiri pagu Cohacju puhtoro jiorpore umusepore ne wahasi. Mari pagu ahbati pagu ijire. Sa ye umusepu jipihitiye decori mari ijiatopore ahri pagu wahasi. ⁵¹⁻⁵²Panopore masa tiquina masiedarire yojopore musare yahu duaja: Mari mehna cjeña ihquiquina yariasi. Sa ye duita, tiquina pagurire comesayequina ijietta. Cornetare tiquiro puti, bato tiri decopu sata waharota marine. Ohõ saha waharota. Corneta bisiri bato yariariquina manare Cohacju masonota jipihitiye decori tiquina ijiatire. Sa yena pagurire comesarina ijinata mari guhu. ⁵³Mari pagurire tiquiro comesagu to pano mari ahbati paguri ijiepeguta mari comesari bato ne ahbasi. Sa ye mari paguri comesagu to pano mari yariati paguri ijiepeguta ne yariasi. ⁵⁴Mari ahbati paguri ne ahbaerati pagurire comesarota. Sa ye mari yariati paguri sa ijiducuaati pagurire comesarota. Sa marine comesagu panopu tiquiro ojoariro sahata sa waharota: “Cohacju yariayere cohã cãri. ⁵⁵Yojopore ne pari turi mari yariasi. Sa yena yariaro mehna pari turi ñano yuhdusi mari”, ni ojoahye panopore. ⁵⁶Mari ñaño buhiri ijigũ pũrita yariaro mehna ñano yuhdunata. Sa ye Cohacju dutiye Moiseret tiquiro curire mari masidi bato, buhiri tiaja mari. Sa yero marine pecapu waha dutire Cohacju dutiye. ⁵⁷Tiquiro sa dutiepeguta mari puhtoro Jesucristo pehe marine pecapu wahaeragu yere. Tiquiro sa yeriquiro ijigũ masina Cohacju mehna bucue, “Quehnoare”, niaja mari.

⁵⁸Sa yena yuhu acaye, yuhu cahina, Cristore wacu tutua duhueraçahña. Sa yena apequina musare quehnoañe buheyere tiquina cohã dutigũ, ne cohãedacahña tire. Sa yena decoripe mari puhtoro Jesucristo tiquiro ye dutiyere quehnoano yeducuya musa. Mari puhtoro Jesucristo yere mari yegu, ahri ihyo waro ijierare. Ahrire masina tiquiro ye dutiyere quehnoano yeducuya musa.

Apequinare Jesu yequinare Corinto cjeña niñeru tiquina ohoatire yahuahye Pablo

16 ¹Yojopore apequinare Jesu yequinare musa niñeru ohoatire yahu duaja musare. Galacia yehpa cjenare Jesu yequinare yuhu dutiriro sahata musa guhu yeya. ²Semanaripe domingo ijigũ jipihitina musa Jesu yequinare ohoati niñerure mehenogã ohoya. Mehenogã cõona mehenogã ohoya. Sa yena paji cjunogã cõona paji cjunogã ohoya. Semanaripe musa sa yegu musa cahapu yuhu esagu musa ohoati niñeru iji tuhasarota. ³Musa ohoatire yahuye purine ojoautja. Sa yegu yuhu topu esagu ti purine topu wahatiquinare musa beseriquinare ohoutja. Sa oho tuhasagu Jesu yequinare musa ohori niñerure neatiquinare ohoutja Jerusalẽpu. ⁴Ti macapure yuhu yeati ijigũ yuhu guhu wahagutja. Yuhu sa wahagu yuhu mehna tiquina wahaeta.

Tiquiro tiniatire yahuahye Pablo

⁵Macedonia yehpa cjēnare ihña yūhdutja yūhū. Yūhdū cā, mūsa cahapū Corintopū esautja. ⁶Topū esagū mūsa mehna meheñe decorigā ijiboaga yūhū ape taha yegū. Yoa cjūri pje pohero ijiro puno mūsa mehna ijiboaga yūhū. Sa yena ape siepū yūhū wahagū mūsa gūhū yūhūre yedoho masine. ⁷Meheñe decorigā iji dueraja yūhū mūsa mehna. Sa yegū Cohācjū cahmegū yoa cjūri pje mūsa mehna ijiitja yūhū. ⁸Sa iji duepegūta Pentecoste bose deco ijigūpū Efesopū ijiniitja yūhū. ⁹Ohōpū Efesopū yojopūre mari pūhoro Jesu yere tūho duayequina peyequina ijire. Tiquina sa ijigū tiquinare yahujaja. Yūhū sa yahugū yūhūre ihña tuhtiyequina peyequina ijire.

¹⁰Timoteo yūhū yero saha mari pūhoro yere yere. Tiquiro sa yeriquiro ijigū mūsa cahapū esagū quehnoano mehna tiquirore piti ca, tiquiro mehna quehnoano bucueye mehna ijiya mūsa. ¹¹Sa yena tiquirore yūhdūdūcaeracāhña mūsa. Sa yena tiquiro cohe tigū quehnoano mehna tiquirore yedohoya yūhū cahapū tiquiro tojoa tagū. Apequina Jesu yequina mehna ūsā tiquirore cohtena naja. Sa yena quehnoano yedohoye mehna tiquirore ohoya.

¹²Apolo mari acayūro Jesu yaquiro mū sare ihñano wahagū tutuaro cahmemi. Sa yegū tiquirore waha dutimi apequina Jesu yequina mehna tiquiro wahatire. Yūhū sa waha dutiepegūta yojopūre tiquiro waha duerare. Sa yero came tiquiro yeye mariedagū mūsa cahapū waharota.

Pablo quehnoa duti bato tiahye

¹³Quehnoano wacū masiña mūsa. Cristore wacū tutua duhueracāhña. Ne cuenata ijiducuya mūsa. Sa yena Cohācjū tutuaye mehna tutuana ijiya mūsa. ¹⁴Apequinare sa cahīducuya.

¹⁵Yojopūre yūhū acaye mū sare ahrire yahu duaja: Estefana ya wūhū cjēna Acaya yehpa cjēna quehnoañe buheyere tūho mūhtariquina, tiquina ya yehpapū Cristore wacū tutua mūhtariquina ijire tiquina pehe. Sa ye apequinare mari acayere Jesu yequinare tiquina quehnoano yedohoducure. Tire mūsa masine. ¹⁶Tiquina yero saha ijiyequinare, apequina Cristo yere yedohoyequinare mūsa quehnoano yūhtigū cahmeaja yūhū. ¹⁷Estefana, Fortunato, Acaico gūhū yūhū cahapū wihi tuhasare. Ohōpū tiquina ijigū quehnoano bucueaja yūhū. Mū sare tiquina bucuegū yeriro saha yūhū gūhūre bucuegū yere tiquina. Mūsa mariedagū mū sare tutuaro wacūmi yūhū. Sa yegū tiquina wihigū bucueaja yūhū. ¹⁸Tiquina mehna ijigū quehnoano jeripohna tigū iji yūhū. Mūsa gūhūre sata bucuegū yere tiquina, yūhū tūhotugū. Tiquinare quehnoano ño peoya mūsa. Sa yena apequina tiquina yero saha ijiyequina gūhūre ño peoya.

¹⁹Asia yehpa cjēna Jesu yequina mū sare quehnoa dutire. Sa ye Aquila, Priscila, tiquina ya wūhūpū cahmecoañequina mehna Cristo tiquiro cahñe mehna mū sare tutuaro quehnoa dutire. ²⁰Ohō cjēna Jesu yequina ijiptiyequina mū sare quehnoa dutire. Mūsa mehna cjēnare quehnoano mehna piti caya.

²¹Yñhũ, Pablo yñhũ basi ahri dihitare ojoaja. Mũsare quehnoa dutiaja.

²²Mari pũhtoro Jesucristore apequiro tiquiro cahĩedagũ, Cohãcjũ tiquirore buhiri dahreahro. Mari pũhtoro sojaro mehna tojoa taahro.

²³Mari pũhtoro tiquiro cahĩñe mehna mũsare quehnoa dutiaja. ²⁴Mari ijipihina Jesucristo yequina ijiaja. Sa yegũ mũsare tutuaro cahĩaja.